

PRIMERA DE CORINTIOS

Apostol Pablopa Corinto Marcachö Criyicugcunaman Puntacag Cartan

Grecia naciunpa Acaya provincianchömi jatuncaray Corinto marcaga cargan. Tsay marcaman Pablo manarag chaptinga, manaragmi ni pipis tsaychö musyayarganragtsu Dios Yayapa Alli Willacuynintaga. Tsayman chaycur Pablo willacuptinmi, waquincag runacuna wiyarnin shumag tantiyarrag, Señor Jesucristoman criyicuyargan. Tsaychömi Pablo täcurgan juc wata sogta quilla Dios Yayapa Alli Willacuyninta yachatsicornin. Corintocho Pablo canganpita masta musyanayquipag, liyinqui Hechos 18.1-17.

Señor Jesucristoman criyicushga caycarpis, Corintocho runacunaga manam Dios Yaya munangannötsu cawacuyargan. Tsaynö carmi quiquincuna puralla chiquinacur (1.10-17; 3.1-4), alläpa yachagtuicornin (3.18-23), Pablota asharnin conträyargan (4.1-21), jutsa rurayllachö cawagcunata chasquiparnin (5.1-13), autoridäcunamanpis jucnin jucninwan demandanacur (6.1-11) y majancunawanpis puñuyta munayargannatsu (7.1-7). İdolocunapa altarninchö pishtayangan aytsacunata micurmi (8.1-13; 10.1-18) Pablo apostol cangantapis manacagman churayargan (9.1-27). Tsaynöllam warmicunapis gojancunatapis mana respetarnin (11.1-16), micupacuyangan fiestacunachöpis mana musyaypa lluta mana allicunata ruracar (11.17-34), Espiritu Santo imanö yanapangantapis mana musyar (12.1-31), cuyanacuy imanö cangantapis mana musyarmi (13.1-13) y runacuna mana yachayangan parlaycunachö Diospa Alli Willacuynintapis yachatsicuyargan (14.1-40). Tsaynöllam criyicugcuna wañunganpita cawamunanpagcagtapis criyiyargantsu (15.1-58). Tsaynö lluta mana allicunata rurarnin cawayaptinmi, cay cartata Pablo apatsirgan rasumpacagta musyayänanpag. Dios Yayapa Alli Willacuyninta runacuna mana cäsuyaptinpis, Pablogam willacurgan tsay Alli Willacuyninta chasquicornin cäsucugcunata Dios Yaya salvananpagcagta (1.18-2.16). Tsaynöpam yachatsicurgan cäsarashgacunapagwan japallancunallarag caycagcunapag (7.8-40) y colaboraciun ofrendata goriyänanpagpis (16.1-4).

Apostol Pablopa saludacuynin

1 ¹Noga Pablotam Dios Yaya voluntäninwan acramarni gayamargan, Señor Jesucristopa

willacug apostolnin canäpag. Tsaynöpam waugentsic Sösteneswan, ²cay cartata gellgamü, Corinto marcachö goricaycur Dios Yayaman mañacug criyicugcunaman, quiquin

Dios Yaya Señor Jesucristowan jutsannag limpiu shongota rurayáshungayquipita. Tsaynöllam gellgayámug, Señor Jesucristopa shutinta alabarnin maytsaychöpis mañacugcunawan quiquin Dios Yaya acrayáshungayquipita santo marcan cayaptiqui. Tsaymi Señor Jesucristoga paycunapawan nogantsicpapis, juc japallan Señornintsic.

³Taytantsic Dios Yayawan Señor Jesucristo cuyacuy yanapacuyincunawan bendiciunninta y alli pásacuyincunata gamcunaman churaycayällämutsun.

**Tucuyläya bendiciuncuna
chasquingantsicpita Dios Yayata
agradëcicushun**

⁴Nogaga imaypis Dios Yayata mañacurnin agradëcicuycä, Señor Jesucristowan llapan cuyacuyinwan yanapacuy bendiciunninta gamcunaman cachamunganpita. ⁵Tsaynö Señor Jesucristota rasumpa chasquiyangayquipitam, cananga llapan bendiciunninwan chasquiyashcanqui, allish palabracunawan yachayniquicunapis. ⁶Tsaynöpam gamcunachö rasumpa musyatsicushga, Señor Jesucristopa Alli Willacuyininta willayaptig chasquirnin criyicyangayqui. ⁷Tsaynö shumag cawacuyaptiquim Dios Yayapitaga yachayniquicunawan ni imayquicunapis manana faltäyáshunquinatsu, cay llapan junagcuna Señor Jesucristo cutimunanta shuyarar caycäyaptiquipis.

⁸Paymi cananga alli firmi tsaracugta catsiyáshunqui, Señor Jesucristo cutimungan junagyag ni imapita acusarnin mana pengacatsiyáshunayquipag. ⁹Dios Yayaga imaycachöpis rasumpa cumplidu cayninwanmi, Tsurin

Jesucristowan jucllayllanö cawacunapag gayamashcantsic, Tsurin Jesucristoga imayyagpis Señornintsic captin.

**Goricaycur Dios Yayaman mañacug
criyicugcuna raquicäyangan**

¹⁰Cuyashga wauegcuna y panicuna, Señor Jesucristopa shutinchömi alläpa rugayag mana raquicarnin llapayqui shumag cuyanacur juc shongonölla imaycachöpis entenditsinacurnin cushishga cawacuyänayquipag. Tsaynölla llapayqui shumag pagta cawacuyay, imaycachöpis yanapanacur juc yarpayyoglla. ¹¹Cuyashga wauegcuna y panicuna, caycunatam niyag quiquiquicuna pura piñanacurnin raquicaychö caycäyangayquita, Cloepa aylluncuna shamur willayámanganta wiyarnin. ¹²Tsaynöga niyag waquiquicuna parlar caynö niyangayquitam: “Nogaga Pablopam cä.” Waquincagnam: “Nogaga Apolospam cä.” Waquinnam: “Nogaga Pedropam cä.” Waquincagnam niyan: “Nogaga Señor Jesucristollapam cä” nir. ¹³¡Imanötan tsay! ¿Señor Jesucristoga acäsu gamcunanö raquicashgacu caycan? ¿Acäsu Pablocu gamcunaraycu cruzchö wañurgan? O ¿Pablopa shutinchöcu gamcunaga bautizacushga cayanqui? ¹⁴Gracias a Dios ashwanmi nogaga ni maygayquitapis bautizayashcagtsu, Crispotawan Gayollata bautizangäpita. ¹⁵Tsaynöpam ni pipis “Pablopa shutinchömi bautizacushcä” ningatsu. ¹⁶(Tsaynöllam Estéfanaspä wajinchö aylluncunatapis bautizargä, pero tsaypita mastaga manam ni pitapis bautizangäta yarpätsu.) ¹⁷Señor Jesucristoga manam runacunata bautizanäpagtsu mandamashga, sinöga Alli Willacuyininta yachatsicurnin willacunällapagmi. Si cay munduchö

runacunallapa yachayninllawan o quiquilläpa yachayniwan aläbacur willacuptäga, Señor Jesucristo cruzchö wañunganpag willacungä mana poderninnag captinmi, ni imapag välenmantsu ni pipis entendinmantsu.

**Señor Jesucristoga Dios Yayapa
llapan yachayninwan poderninmi**

¹⁸Canan esplicayäshayqui: Señor Jesucristo cruzchö wañunganta mana criyirnin mana cäsucugcuna infiernuman aywagpag destinashgacunapagga, imayca juc burlanöllum. Pero salvacuyta ashigcagpagwan llapantsic payman rasumpa criyicugcunapagmi sïga, Alli Willacuyninwan cruzchö wañunganga quiquin Dios Yayapa podernin.

¹⁹Tsaymi Diospa Palabbranchö gellgashga caycan:

“Alläpa yachagtucugcunapa yachaynincunata ushacätsirmi, imaycata allish yachar entendigcunatapis manana entenditsishagnatsu” nir.

²⁰¿Maytan tsay alläpa imaycata entendig runa? ¿Maytan tsay allish yachayninwan yachatsicug runa? ¿Maytan tsay cay patsachö imayca yachaycunapag discuticug runa? ¿Dios Yayaga manacu cay mundupa alläpa allish yachaynincunata mana ni imapag välegman churashga? ²¹Dios Yayaga alläpa poderöso yachag cayninwanmi unaypitana musyrgan, cay patsachö alläpa yachayyog runacuna yachaynincunallowanga Dios Yayata mana regeyänanpag canganta. Tsay yachagtucug runacunapag Alli Willacuynin mana ni imapag servignö caycaptinpis, Señor Jesucristoga llapantam salvayta munashga Alli

Willacuyninman rasumpa criyicurnin confiacuyaptinga.

²²Judiucunaga juc milagröso señaltaragmi ricayta munayan y griegocunanam alläpa yachaycunata ashiyan. ²³Pero nogacunanam willacurnin yachatsicuyä Señor Jesucristo cruzchö wañurnin salvamangantsicta. Tsaynö Alli Willacuyninta yachatsicuyangämi judiucunapagga imayca abusacuynö y griegocunapagnam ni imapagpis mana servig. ²⁴Pero Dios Yaya acrarin gayangancag criyicugcunapagmi sïga, judiu o griego cayaptinpis Señor Jesucristoga quiquin Dios Yayapa llapan yachayninwan podernin. ²⁵Dios Yayapa yachaynin imayca mana servignö caycarpis, cay patsachö runacunapa yachaynincunapitaga mas poderöso yachaymi. Tsaynöllum Dios Yayaga imayca callpannagnö débil caycarpis, cay patsachö runacunapitaga mas callpayog poderöso. ²⁶Cuyashga waugecuna y panicuna, tantiyacuyay: Cay patsachö runacunapag cäsi llapayqui mana ni ima musyag ni ima mandacuyyog caycäyaptiqui gayayäshungayquita. Tsaynöllum cäsi llapayqui mana imannag wactsa umilde caycäyaptiqui gayayäshushcanqui. ²⁷Pero Dios Yayaga cay patsachö “mana ni ima musyag upa” niyangancunatam acrarin gayashga, tsay alläpa yachayyogcunata pengacatsinanraycu. Tsaynöllum cay patsachö mana callpannag débilcunata acrashga, alli callpancunawan mandacugcunata pengacatsinanpag. ²⁸Tsaynöllum Dios Yayaga acrashga cay patsachö mana imapag servignin despreciashgacunata, aläbacurnin despreciagnincunapa yarpaynincunata manacagman

churananpag. ²⁹Tsaynöga rurargan puntanchö ni pipis ni imapita orgullöso car, mana aläbacunanpagmi. ³⁰Pero Dios Yayatam alläpa agradécicu Señor Jesucristowan juclayllatanö rurayäshurniqui, allish yachaynin nogantsicchö captin Pay munangannölla mana jutsannag cawacuyangayquipita. Tsaynöpam Dios Yaya alli ricämarnintsic Señor Jesucristoraycu, imayca mana ni juc jutsannagtanö salvamarnintsic libramäshun. ³¹Tsaymi Diospa Palabrancho niran: “Si pipis aläbacuyta munarga, Señor Jesucristollapag aläbacutsun.”

**Cruzchö wañug Señor Jesucristopa
Alli Willacuynin**

2 ¹Cuyashga wauecuna y panicuna, Dios Yayapa Palabranta willacurnin yachatsigniquicuna shamurga, manam juc alläpa yachayyog allish parlag runanötsu yachayniwan willayargag. ²Tsaymi nogaga gamcunacagchö caycar cada junag yarparargä, Señor Jesucristo nogantsicraycu cruzchö wañunganllapag. Tsaypitaga mastaga manam ni imata musyaytapis munargätsu. ³Tsaynö caycarpis gamcunacagmanmi chämurgä mana juc callpanagnö débil mantsacuywanpis carcariarrag. ⁴Nogaga Dios Yayapa Alli Willacuyninta willacurnin entenditsiyargag, manam alläpa yachayyog runacunanötsu. Mas bienmi rasumpa firmi criyicuyänayquipag entenditsiyargag, Dios Yayapa poderninwan Espiritu Santo yanapamanganta musyatsiyarniqui. ⁵Tsaymi nogaga yachatsiyargag Dios Yayapa poderninman rasumpa firmi criyicur, cay patsachö runacunapa yachaynincunallaman manana confiacuyänayquipag.

**Espiritu Santopitam allish
yachaycunaga shamun**

⁶Tsaynö caycaptinga firmi criyicurnin rasumpacag yachaynintsicwan yashga alli juiciuyognö willacur parlantsic. Pero tsay yachaynintsicga manam cay patsachö runacunapa yachaynintu ni maygan mandacugcunapa yachaynin juc tiempulla cay patsallachö ushacagnötsu. ⁷Mas bienmi imayca pacayllapanö caycag Dios Yayapa alläpa yachayninta willacur yachatsicuntsic. Tsay yachatsicuytaga imayca pacarätsignömi Dios Yaya manarag cay patsata camarnin catsirgan, canan shamug tiempuyag. Tsaynöpam imayca pacaraycagnö Dios Yayapa yachayninta willacushga, unaypitana destinashga cargan alläpa cushishga shumag cawacunapag. ⁸Tsaymi cay patsachö mandacug autoridäcunaga ni imata entendiyargantsu. Si rasumpa entendirnin musyarga, alläpa cushicuyyog poderöso Señor Jesucristota manam cruzchö wañutsiyanmantsu cargan. ⁹Tsaypagmi Diospa Palabrancho niran:

“Manam ni maygan ñawi ricashgatsu, manam ni maygan rinri wiyashgatsu.

Tsaynöllam ni maygan runapa allish yachayninpis musyashgatsu, llapan cuyagnin runacunapag Dios Yayaga prevenishga catsingantaga.”

¹⁰Tsaymi cananga quiquin Dios Yayapa Espiritu Santon caycuna llapanta regetsimashcantsic. Espiritu Santom Dios Yayapa yachayninchö imayca pacaraycagnö llapan mana regengantsicta rasumpa regen.

¹¹Tsaynö caycaptinga, ¿pirag musyanman juc runa shongollanchö imatapis yarpaycanganta, quiquinpa shongonchö espíritulla llapan imayca yarpangantapis mana musyaptinga? Tsaynöllam ni pipis Dios Yayapa yarpaynintaga musyantsu, sinöga quiquin Espiritu Santonllam musyan. ¹²Nogantsicga manam cay mundupa espírituntatsu chasquishcantsic, sinöga quiquin Dios Yayapita shamug Espirituntam mana juc pägacurlla chasquishcantsic, alläpa cuyamantsic tucuylä bendicuninwan rasumpa yanapamangantsicta musyanapag. ¹³Caycunapagmi willacurnin parlantsic, manam cay patsachö runacunapa yachayllanpitatsu, sinöga quiquin Espiritu Santopa yachayninpita palabrawanmi rasumpacagcunallata yachatsicuntsic Dios Yaya imanö canganta. ¹⁴Pipis Espiritu Santota shongonchö mana catsirga, Espiritu Santopita shamugta manam chasquingatsu, tsay runapagga imayca mana ni imapag serviptin. Tsaynöpam ni imatapis mana juc entendingatsu, Espiritu Santollawan llapan imaycatapis rasumpa entendina captin. ¹⁵Pero pipis Espiritu Santowan cawarga, llapan imayca alli o mana alli cangantam musyan. Tsaynö Espiritu Santo yanapaptin Dios Yaya munangannö cawaptinmi, tsay runataga ni pipis juzgarnin acusangatsu.

¹⁶Tsaypagmi Diospa Palabran gellgashgachö nirgan:
 “¿Pitan Señorpa yarpayninta regen?
 ¿Imapagtan payta yachatsinman?”
 Pero nogantsicmi siga, Señor Jesucristo yarpangancunallata yarpamin catsintsic.

**Goricaycurnin Dios Yayaman
 mañacur criyicugcuna
 raquicäyangan**

3 ¹Nogaga waugecuna y panicuna, manam imayca yashga runanö rasumpa Espiritu Santota

cäsugcunatanötsu parlapäyargag. Sinöga cay munduchö runamajiquicunallapa yarpayninwan mana ima musyag wamranö Señor Jesucristoman tsayrag criyicuycäyaptiquim yachatsiyargag. ²Tsaymi nogaga mas fácilcagllata yachatsiyargag imayca llullu wamra lichillatarag upur chucru micuytaga manarag micugtanö. ¡Tsaymi cananyagpis gamcunaga tsaynöllarag caycäyanqui, ³cay patsachö runacunapa yarpayninllarag yarpayniquicuna captin! Tsaynö chiquinacurnin piñanacur caycarga, ¿manacu imayca pishi wamranö mana juiciunagllarag caycäyanqui? Gamcunaga cay patsachö runacunapa yarpayllanwanmi portacuycäyanqui. ⁴Si pipis caynö nirga: “Nogaga Pablotam gatirä” y waquincagna “Nogaga Apolostam gatirä” nir. Tsaynöga ¿manacu yarpaycäyanqui cay patsachö runacuna yarpäyangancunallata?

⁵Tsaycuna llapanpitapis rasumpacagtaga, ¿pitan Apolos? ¿Pitan Pablo? Paycunaga servicugllam cayan. Tsaynöpam paycuna yachatsiyäshuptiquilla Señor Jesucristomanpis rasumpa criyicuyargayqui. Dios Yayam cada ünuta cachayämargan segun pay encargayämangallanta ishçäcunapis cumplinrin yachatsicuyänäpag. ⁶Nogam yachatsiyargag imayca muruta murugnö, Apolosnam imayca pargognö cuidayäshushcanqui. Pero tsay murugnö yachatsiyangagtaga quiquin Dios Yayam rasumpaga wiñatsiyäshushcanqui. ⁷Tsaymi muruginwan pargor cuidagninpis, manacagnölla cayan. Pero quiquin Dios Yayallam llapan poderninwan tsay plantatapis allish

wiñatsin. ⁸Noga Pablo imayca juc murucugnö yachatsiyarniqui y Apolos pargognö cuidayäshuqtiquipis, ishcäcunaga iwalllam munayä criyicuyniquicunachö wiñagnö mas firmi tsaracuyänayquita. Pero quiquin Dios Yayam cada ünü imanö aruyanganpita päganga, janag patsa gloriachöpis mana ushacag cawayta tarinanpag. ⁹Tsaymi nogacunaga imayca arurnin servicugnölla Dios Yayata yanapar cayapti, gamcunaga Dios Yaya arutsicungan chacran car, täcungan wajin cayanqui.

¹⁰Nogata quiquin Dios Yaya cuyamarni yanapamar mincamashga captinmi, allish cemientu patsäsigllan cä. Y waquincagnam tsay cemientupa jananman pergarnin ushagga cayanga. Pero tsay cemientupa jananman yapag runacunaga cada ünü alläpa cuidädu cayanman. ¹¹Dios Yayapa wajinpagga juc japallan cemientu churashga cargan. Tsay cemientuga Señor Jesucristoman rasumpa firmi criyicungantsicmi. ¹²Si pipis tsay alli rurashga cemientu jananman yaparnin, gorita, gellayta, shumag perlas rumita, gerucunata y shogoshta churashga captinpis, ¹³cay patsa ushacangan junagchöga imanöpis yaparnin churanganmi mas allish rasumpa musyacashga canga. Tsay junagchö imayca ninanö rupacur shamuptinmi, alli rurashga runapaga ninawan rupatsir pruebaptinpis ni imanangatsu. Pero mana alli rurashgacagpam siga, imayca shogosh ninawan rupagnö jancat ushacasquina. ¹⁴Si pipis ninawan mana rupag alli wajitanö Dios Yayaraycu rurashga carga, cay mundu ushacangan junagchömi mana ushacag caway päguta chasquina. ¹⁵Pero si pipis

shogoshllapita fácil rupasquipagta rurashga carga, llapan imayca rurangantapis jancatmi perdinga, aunqui quiquina imayca rupacurnin ninapita geshpignö salvacarpis.

¹⁶¿Acäsu gamcunaga manacu musyayanqui Dios Yaya täcungan waji cayaptiqui, Dios Yayapa Espiritu Santonpis gamcunachö caycanganta? ¹⁷Si pipis Dios Yaya täcungan wajita contrarnin mana allacunata rurur ushacätsiptinga, quiquin Dios Yayam tsay runatapis jancat ushacätsinga. Dios Yayapa täcungan wajiga juc santo wajim, tsay santo wajiga gamcunam cayanqui.

¹⁸Ama ni pipis quiquillayquicuna engañacuyaytsu. Si maygayquipis cay patsachö allish yachayllayquicunawan alläpa yachayyog carga, imayca mana ni ima musyagnölla umilde cawacuyay, rasumpacag allish yachayyog cayänayquipag. ¹⁹Cay patsachö runacunapa alli yachaynincunaga, Dios Yayapagga mana ni imapag välegmi. Tsaypagmi Diospa Palabbranchö niran: “Dios Yayaga yachayllapa engañacur llullacugcunatam quiquincunapa palabrancunallawan, imayca trampaman shicwatsignö imaycatapis taripun.” ²⁰Caynöpismi niran: “Señorgam musyan llapan alläpa yachagcunapa yarpaynincuna mana ni imapag väleg canganta.” ²¹iTsaymi ni pipis ama aläbacur orgullöso cangatsu juc runapita yachacuycarga! Imanö captinpis quiquin Dios Yaya llapanta garayäshushcanqui, ²²Pablota, Apolosta, Pedrota, cay patsachö cawayta, wañuyta y canantawan shamugpagcagtapis, llapanmi gamcunapa cayan. ²³Tsaynöllam gamcunapis Señor Jesucristopa

cayanqui y Señor Jesucristonam quiquin Dios Yayapa.

Señor Jesucristopa gatragnin apostolcunapa aruynincuna

4 ¹Gamcunaga Señor Jesucristota servignin yanapagnintanölla ricäyämänquiman. Nogacunaga Dios Yaya pacayllapanö Alli Willacuyñinta willacug encargädoncunallam cayä. ²Pipis juc encargota chasquishga carga, tsaynö rasumpa alli confiacurnin encargayanganta cumplidu cayninwan musyatsicutsun. ³Nogaga manam ima rurangäcunapita yarpachacütsu, gamcuna imanö cangäta parlayämänayquita ni cay patsachö mandacuyyog juezcuna juzgayämänanta. Manam ni quiquipis ni ima rurangäpita juzgacütsu. ⁴Concienciä limpiu canganta yarpami Dios Yayapa puntanchö mana jutsannag carpis, llapan imayca rurangäpita quiquin Señor Jesucristo juzgamänapag canganpitaga manam libritsu cä. ⁵Tsaymi gamcunaga ama ni pitapis juzgayanquitsu, manarag tiempu chämuptinga. Tsaypa rantinga mas bien Señor Jesucristo cay patsaman cutimungan junagta shuyäyanqui. Tsay junagchömi Señor Jesucristoga imayca tutapaychönö shongoncuna rurinchö pacaraycagtawan llapan yarpäyanganta, imayca actsiman jipignö jancat musyacätsinga. Tsaymi siga llapan runacunatapis cada ünuta imatapis rurayangapita Dios Yaya aläbarnin cushicuy alli garayta gloriachö imayyagpis cawayänapag garanga. ⁶Cuyashga wauecuna y panicuna, Apolostawan nogata juc ejemplu churarmi, bienniquicunapag caycunataga niyag. Cay ejempluta willayag rasumpacag gellgashgacunapita mana masta

parlarnin, mana allicunata mana rurayänayquipag. Tsaynölla ama jucninta aläbarnin jucnintaga despreciayanquitsu. ⁷Tsaypunga ñipitan ganta waquincagcunapita mas mejorta rurashushcanqui? ¿Imayquitan capushunqui Dios Yaya mana garashungayqui? Si tsaynö chasquiyarga, ñimanirtan alläpa aläbacur orgullöso canqui, imayca quiquillayqui imaycatapis rurarnin tarignö?

⁸¿Cananga llapan imay munayangayquim cayäpushunqui! ¡Tsaynöpam cananga imaycayog ricu caycäyanqui! ¡Gamcunaga imayca reynö quiquillayquicuna carmi, nogacunapitaga manana ni imatapis wanayanquinatsu! ¡Ojala rasumpacag rey cayanquiman, mandacuyñiquicunachö nogacunawanpis pagta mandacunapag! ⁹Nogaga talbesga llapä apostolcunapag yarpä, Dios Yaya destinanganta imayca militaruna desfilagpa gepanta juc marcapa campunchö wañugpag destinashga aywagnö cayangäta. Alläpa sufrirmi maytsay munduchö runacunapagwan angelcunapis, ricarar cushipänan cayashcä. ¹⁰¡Señor Jesucristoraycum, mana ima musyag upanö cayä! ¡Pero gamcunam siga alläpa allish yachayyog cayñiquicunawan Señor Jesucristota alläpa regeycuyanqui! ¡Nogacuna callpannag cayaptimi, gamcunaga alläpa allish jinchi callpayog caycuyanqui! ¡Tsaymi nogacunataga alläpa chiquirnin despreciayäman, pero gamcunatam siga allish cuyarnin respetaycuyäshunqui! ¹¹Nogacunaga asta cananyagmi runacuna maltratayämaptin alläpa sufriyashcä, mallag mallag yacunarpis wajícuna mana captin ratay llatapashga purirnin.

¹²Cay maquicunawanmi alläpa pishipashga caycarpis alli aruyargä. Chiquirnin insultar maldiciunäyämaptinpis, nogacunaga Dios Yayapa bendiciuninwanmi contestayä. Alläpa chiquir gaticachäyämaptinpis, mana ni imata parlarcurmi awantayäshcä. ¹³Conträcuna pengacuypag tucuyläya mana allicunata parlayaptinpis, nogacunaga consejarnin mana piñaycacharllam cushishga chasquiyä. Tsaymi nogacunataga cay patsachö llapan runacunapa mana allinman churayämar, imayca melanaypag basuratanö ricäyämän asta cananyagpis.

¹⁴Caycunataga gellgamü manam pengacatsiyänagpagtsu, sinöga imayca quiqiupa cuyay wamränö cayaptiquim, plëturnin consejayarniqui gellgamü.

¹⁵Aunqui juc chunca waranga yachatsicugcuna Señor Jesucristopag yachatsicur willayäshurniquipis, manam mas taytayquicunanöga cayantsu. Señor Jesucristoman rasumpa criyicyünayquipag Alli Willacuyninta yachatsigniucuna taytayquicunaga nogam cä, rasumpacag salvaciunpag willayangapita. ¹⁶Tsaymi cananga alläpa rugaycuyag, gamcunapis nogapa ejemplüta rurarnin sigiyänayquipag.

¹⁷Tsay ejemplüta sigir cawayänayquipagmi waugentsic Timoteota cachamü. Paymi alläpa cuyay wamränö car, Señor Jesucristoman alläpa firmi criyicurnin cumplüdu cayinwan imanö cawacungäta yarpätsiyäshunqui. Tsaynöllam willayäshunqui maytsaypa purir alli portacungänölla llapan criyicugmajintsiccuna goricäyanganchö willacur yachatsicungätapis.

¹⁸Cananga waquiquiga alläpa importanti orgullösotucurmi caycäyanqui, noga mana cutimunä

canganta yarparnin. ¹⁹Pero imay öra carpis prontum watucagniquicuna shamusquishag, Dios Yaya munaptinga. Tsaychömi siga mä ricäshag llapan alläpa aläbacur orgullösotucugcunata. Mä rasumpacush Dios Yayapa poderninman confiacur cawaycäyan. Ama siga imatapis shimincunallowanga aläbacuyätsuntsu. ²⁰Dios Yayapa Mandacuy Reynonga manam aläbacurnin shimillantsicwan parlanallapagtsu, sinöga poderninwan yanapamashga Señor Jesucristo munangannö cawacunapagmi.

²¹¿Imatatan gamcunaga munaycäyanqui? ¿Chicötita aptacur watucagniquicuna shamurnin, alli astar castigayänagtacu o alläpa cuyarnin llaquipäcuy shongöwan cushishga chasquiyänagtacu?

**Gamcunachö juc
criyicugmajiquicuna
madrestallanwan täcugta gargoyay**

5 ¹Musyashcänam gamcunachö mana allicunata rurarnin jucnin jucninwan lluta puricucyängayquita. Tsaynöllam musyashcä gamcunachö juc runapis madrestallanwan, imayca warminwannö täcurnin mana allita ruraycäyanganta. Tsaynö mana allicunata rurar madrestallanwan täcunganga pengacuypag alläpa mana alli jutsam, tsaytaga manam aceptayanmantsu Dios Yayata mana regeg runacunapis. ²¿Tsaynö tucuyläya mana allicunata ruracäyaptinpis, alläpa aläbacurnin orgullösom caycäyanqui! Tsaynö cayangayquipa rantinga mas bien arepenticurnin imayca wañupucushganö llaquicyuniquicunachö car, tsay mana allita rurag runataga ñimanirtan mana gargoyashcanquinatsu? ³Noga cuerpuwan mana pagtayquicuna carpis,

espiritüwanga imay örapis
 pagtayquicunallam caycä. Tsaymi tsay
 mana alli rurag runataga imayca
 läduyquicunachö caycar juzgagnö, jutsa
 ruranganpita gamcuna
 gargoyänayquipag sentenciashcä.
⁴Tsaymi gamcuna Señor Jesucristopa
 shutinchö goricäyaptiquipis nogaga
 espiritüwan pagtayquicuna caycäshag.
 Tsaynöllam Señor Jesucristopa
 poderninpis gamcunapa pagtayquicuna
 caycanga. ⁵Tsaynö mana allita ruracar
 madrestallanwan täcug runataga
 Supayta entregayay, cay patsachö
 cuerpun ushacaptin Señor Jesucristo
 cutimungan junag almallanpis
 salvacänanpag.

⁶Gamcuna aläbacunin
 caycäyangayquiga manam allitsu.
 ¿Manacu musyayanqui, ichiclla
 levadüra maytsica mäsa pogotsirnin
 miratsinganta? ⁷Tsay mana alli
 ruratsicug levadürataga jucläman
 jitariyay. Gamcunaga imayca Pascua
 fiestachö micuyang levadürannag
 mushog mäsapita rurashga tantanö
 jutsannag limpiu shongoyog
 cayänayquipag. Señor Jesucristotam
 nogantsicraycu wañutsiyargan, imayca
 Pascua junagchö juc mallwa cordëruta
 sacrificiuta rurar wañutsiyangannö.
⁸Tsaymi canan alläpa cushicuywan
 rasumpacagllata parlar alli
 voluntänintsicwan cuyanacurnin, cay
 Pascua junagtaga imayca juc mushog
 mäsapita tantawannö shumätsishun.
 Amana chiquinacur imatapis mana
 allacunata yarparnin rurashunnatsu,
 imayca mana servig levadüranöga.

⁹Juccag cartächömi niyargag, tsay
 jucnin jucninwan mana allacunata
 ruracar puricugcunawan mana
 juntawacäyänayquipag. ¹⁰Pero caynö

niyangagwanga manam niyargagtsu:
 Raquicäyay tsay lluta mana allita rurar
 puricugcunapita, gellayllapag
 ayrajagcunapita, engañacug
 suwacunapita, idolocunallata
 adoragcunapita ni cay munduchö llapan
 runacunapita raquicäyay nirtsu. Tsaynö
 raquicar cayay niyaptigga, manach cay
 patsachö ni juc runawanpis
 juntawacäyänayquimantsu. ¹¹Tsaynö
 caycaptinpis cananga nogam
 niyayniqita munargä: “Tsay lluta
 jucnin jucninwan puricugcuna,
 gellayllapag ayrajagcuna, idolocunallata
 adoragcuna, llullacur cuentuta
 puritsigcuna, alläpa machashga
 purigcuna, engañacur suwacugcuna,
 ‘Waugesütu nogapis Dios Yayamanmi
 criyicü’ niyäshuptiqui, mana
 juntawacäyänayquipag.” Tsaynö mana
 alli rurag runacunawanga ama ni
 micugllapis pagtaga jamayanquitsu.
¹²¿Acäsü nogaga gamcunawan mana
 goricag runacunataga juzgämancu?
 Manam. Pero gamcunawam pagta
 goricagcunatam siga gamcuna
 juzgayänayqui. ¹³Dios Yayam
 gamcunawan mana pagta caycag
 runacunataga juzganga. Tsaynö
 caycaptin, “Tsay mana alli rurag
 runataga gamcunapita gargoyay.”

Criyicugcuna demandanacur piñanacuyangan

6 ¹Si maygayquipis juc runawan
 piñanacur contran quëjargua,
 ¿imanirtan tsay pägallapag ayrajag
 juezcunaman demandagnin
 aywayanqui? Tsaypa rantinga ¿Dios
 Yayaman criyicugcunapa puntanchö
 manacu ima quëjacuyangayquitapis
 shumag arreglayanquiman? ²¿Manacu
 musyayanqui Dios Yayaman rasumpa

criyicugcuna, shamugcag tiempuchö llapan runacunata juzgayänanpag canganta? Si shamugcag tiempuchö runacunata juzgayänayqui caycaptinga, ¿imanirtan tsay alläpa ichiclla quëjacuytaga gamcuna juzgarnin mana arreglayanquitsu? ³¿Manacu musyayanqui asta angelcunatapis juzganantsicpag canganta? ¡Tsaynö juzgana caycarga masragchi canan cawaynintsichö ichiclla asuntucunataga fácil juzgashwan! ⁴Tsaynö caycaptinga cay vidachö piñanacurnin demandanacurga, ¿imanirtan pägallapag ayrajag juezcunamanrag demandanacug aywayanqui? Tsay juezcunaga manam ni imata musyayantsu goricaycurnin Dios Yayaman mañacugcuna imanö cawacuyangantapis. ⁵Tsaycunataga pengacatsiyänagpagmi niyag: ¿Acäsü manacu gamcunachö ni juc runallapis alli yachayyog can, llapayqui criyicugcunapa puntanchö juzgarnin tsay ichic demandanacucunata patsätsinanpag? ⁶Tsaypa rantinmi gamcunaga criyicug püralla demandanacur imana criyicug juezcunapa puntanchö pengacuypag piñanacug aywayanqui!

⁷Rasuncagtaga quiquiquicuna puralla demandanacurmi, criyicuyniquicunatapis gongasquir pengacuypag mana allita rurarnin caycäyanqui. Tsaynö cayangayquipa rantinga, ¿manacu tsay mana allicunata rurayäshuptiquipis awantacucuyanquiman? Tsaynölla ¿manacu engañarnin suwapuyäshuptiquipis perdonar dejapuycuyanquiman? ⁸Gamcunaga tsaynö cayangayquipa rantinmi, demandanacurnin quiquiquicuna puralla mana allicunata ruracar, criyicugmajiquicunatapis suwapurnin juzganacur caycäyanqui.

⁹¿Manacu gamcunaga musyayanqui mana alli rurag runacunaga, cieluchö Dios Yayapa Mandacuy Reynonman ni imaypis mana yaycuyänanpag canganta? ¡Ama llullatsir engañayäshunayquita gamcunapis dejacuyanquitsu! Lluta jucnin jucninwan llutan mana alli jutsata rurag puricugcuna, ñdolocunata adoragcuna, casädo caycar jucwan täcugcuna, mari mächocunawan täcugcuna, ollgo puralla mana allita ruracagcuna, ¹⁰suwacugcuna, gellayllapag ayrajagcuna, alläpa macharnin upyagcuna, runamajinpag manacagcunata parlagcuna, llutalla willapäcugcuna ni runamajinta engañarnin llullacur suwapucugcuna manam ni imay Dios Yayapa Mandacuy Reynoman yaycuyangatsu. ¹¹Tsay mana alli ruragcunam waquiquiga puntata cayargayqui. Pero cananmi siga shongoyquita limpiashgana car, quiquin Dios Yayawan pagta shumag cawacuycäyanqui. Tsaymi cananga Señor Jesucristopa shutinraycu Dios Yayantsicpa Espiritu Santonwan salvacashga jutsannag caycäyanqui.

**Cuerpuntsicga ama jucnin
jucninwan puricur mana allita
rurar catsuntsu**

¹²Waquingam niyan: “Nogagam munangäta ruranäpag librina cä” nir. Aumi librinam cantsic, pero libri cayniquiwan llapan rurangayquiga manam Dios Yayataga convenintsu. Si munangäta ruranäpag librina carpis, manam lluta mana alli ruraycuna vencemänantaga dejacütsu. ¹³Waquinnam niyan: “Micuyta micunapagmi pachantsicga y pachantsicnam micuyta chasquinanpag.” Tsaynö caycaptinpis Dios Yayaga ishcantam jancat

ushacätsinga. Tsaymi cuerpuntsicga lluta jucnin jucninwan mana allacunata rurur puricunapagtsu. Cuerpuntsicga Señor Jesucristopagmi y Señor Jesucristonam nogantsicpa cuerpuntsicchö cawan. ¹⁴Dios Yaya alläpa poderöso cayninwan Señor Jesucristota cawatsimungannöllum, nogantsictapis cawatsimäshun.

¹⁵¿Manacu musyayanqui, cuerpuyquicunaga quiquin Señor Jesucristopa cuerpunpa partincuna canganta? Si noga Señor Jesucristopa cuerpunpa partin caycarga, ¿imanötagshi lluta munanganwan puricug warmiwanga täcüman? ¡Tsayga manam ni imanöpa allitsu canman! ¹⁶¿Manacu musyayanqui lluta mana allita rurur munanganwan puricug warmiwan juc runa churacasquirga, ishcanpis juc cuerpunöllana cayanganta? Diospa Palabranmi nirgan: “Ishcanmi juc cuerpullana cayanga” nir. ¹⁷Pero pipis Señor Jesucristoman rasumpa firmi criyicurga, imayca juc cuerpunölla Señor Jesucristowan cayanga.

¹⁸Witicurnin geshpicuyay llutan mana allacunata ruracar jucnin jucninwanga puricuyacunapita. Pipis jucläya jutsata rurarga manam cuerpunpa contrantsu ruraycan. Pero lluta jucnin jucninwan puricurmi säga, cuerpunpa contran llapan mana alli jutsacunatapis ruraycan. ¹⁹¿Acäsu manacu musyayanqui Dios Yayapita chasquiyangayqui Espiritu Santopa gamcunachö täcuptin cuerpuyquicuna wajin canganta? Manam gamcunatsu cuerpuyquicunapa dueñonga cayanqui. ²⁰Quiquin Dios Yayam Señor Jesucristopa alläpa chaniyog yawarninwan rantiyäshushcanqui.

Tsaymi Dios Yayata alabarnin respetashun, llapan cuerpuntsicwan pay munangannö allillata rurarnin cawacur.

Casarashgacuna imanö cawacuyänapag plëtucuycuna

7 ¹Tsay cartayquicunachö tapucayämangayquitam canan contestayäshayqui: Mas allim canman, juc ollgo warmiwan mana täcuptin. ²Pero lluta jucnin jucninwan puricur cayanganpa rantin mejorga cada runa warmiyog cayta munarga, juc warmillawan casarasquir shumag pagta täcuyätsun. Tsaynölla warmipis juc ollgowan täcuyta munarga, quiquinpa gojan cananpag casaracutsun. ³Tsaynö casaracusquirga ollgopis casädo vidancunachö warminwan shumag manana raquicar cawacutsun. Tsaynölla warmipis casaracusquirnaga ollgonwan shumag cawacutsun. ⁴Tsay casaracungan junagpitaga warmipa cuerpunpa mananam quiquinpanatsu, sinöga gojanllapanam. Tsaynöllum ollgocagpa cuerpunpis quiquinpanatsu, casaranga örapitaga warminpana captin. ⁵Tsaymi ishcanunapis manana ni imanöpa camantsacar nëganacuyänannatsu. Pero si Dios Yayaman mañacuyänayquipag juc tiempulla caman cayta munarga, tsaynö caman cayanqui. Dios Yayaman mañacurnin caman casquirpis, yapay juntawacasquir shumag cawacuyanqui. Mana tsaynö sas yapay juntawacayaptiquiga, Satanasmı mana alli jutsaman ishquitsiyäshunqui cuerpuyquicunata mana dominayta püediyaptiqui. ⁶Caycunataga consejaryarniquim niyag, manam juc mandamientutatsu. ⁷Nogaga munämanmi llapayquipis noganö

quiquillayquicuna cacuyänayquita. Pero quiquin Dios Yayam cada ünuta camamashcantsic casaranapag o mana casaranapagpis. Tsaynöllam cäda ünuta camamashcantsic tucuyläya imaycanöpis cawacunapag.

⁸Tsaymi soltërucunatawan viudacunata ni: Mas allim canman japallancuna cacuyaptin noga japallä cacungänö. ⁹Pero si waquincagcuna cuerpunta mana dominayta puedir, piwanpis alläpa täcuyta munayarga, mejorga casaracuyätsun mana allícunata ruracar jucnin jucninwan puricuyanganpa rantinga.

¹⁰Llapan casaracushgacagcunatam cay mandädüta ni (cayga manam nogapa mandacuyñitsu sinöga quiquin Señor Jesucristopitam): Juc warmi ollgowan churacasquirga tsay gojanpita ama ni imaypis raquicangatsu. ¹¹Pero si tsaynö caycaptin gojanpita raquicasquirga manam yapayga jucwan casaranmantsu, mejorga quiquillannam cawacunman o yarpatchacusquir, gojanwan amistayta munarga rasumpa amistacunga. Tsaynölla ollgopis warminta dejarnin ni imanöpa raquicätsuntu.

¹²Pero waquiquitam noga yar pangallata niyag (manam Señor Jesucristopa mandacuyñitsu cayga): Si maygan criyicugmajintsicpa warmin mana criyicug caycar gojanwan shumag alli täcuyta munaptinga, tsay rasumpa criyicug wauega raquicätsuntu warmin mana criyicug captinpis. ¹³Tsaynölla juc criyicug warmipa gojan mana criyicug caycar warminwan shumag alli täcuyta munaptinga, tsay criyicug paniga raquicätsuntu gojan mana criyicug captinpis. ¹⁴Tsaymi tsay gojan mana criyicug caycaptinpis, criyicug warmiwan juntawacanganpita Dios Yayapis jutsannagtanö chasquina. Tsaynöllam juc mana criyicug warmipis,

criyicug runawan juntawacanganpita Dios Yaya jutsannagtanö chasquina. Mana tsaynö captinga wamrancunapis jutsasapam cayanman. Tsaynö shumag cawacuyaptinmi llapan wamrancunatapis Dios Yaya jutsannagta cushishga chasquina.

¹⁵Pero tsaynö caycaptinpis warmiwan ollgopis Señor Jesucristoman mana criyicur, raquicayta munaptinga ama amatsayanquitsu. Si tsay criyicugpa warminpis o ollgonpis raquicarnin aywacuscuptinga, tsay criyicug wauegan panipis librim quëdacunga. Tsaynö libri mana rabiacurnin alli päscuychö shumag cawacunapagmi, Dios Yayaga gayamashcantsic. ¹⁶Warmi ¿gamga puedinquicu gojayquita Señor Jesucristoman rasumpa criyicatsir salvayta? Ollgo ¿gampis musyanquicu warmiquita rasumpa criyicatsirnin salvanayquipag?

¹⁷Tsaymi nogaga munä llapanpis cada ünü shumag alli cawacuyänanta, Señor Jesucristo acaptin Dios Yaya gayangan örachö cayangannölla. Caycunatam noga niyag llapan maytsaychö goricaycur Dios Yayaman mañacug wauecuna y panicuna. ¹⁸Si Dios Yaya maygayquitapis cuerpuquicunachö señalacushgata gayayäshushga cayaptiquiga, ama señalacushga cayangayquipita disimuläyanquitsu. Tsaynölla mana señalacushgacagpis, Dios Yaya gayayäshuptiqui cuerpuquicunachö ama señalacuyanquitsu.

¹⁹Cuerpuquicunachö señalashga o mana señalacushga cayangayquipis manam ni imapag balintsu. Tsaynö señalacuypitaga quiquin Dios Yayapa llapan mandamientuncunata cäsurnin cumplingantsicmi masga välen.

²⁰Tsaymi cada ünü imanöpis caycagta Dios Yaya gayayäshungayquinölla,

shumag cawacuyanqui. ²¹Si juc runapa servig esclävun caycaptiqui Dios Yaya gayashga cashuptiquipis ama yarpachacunquitsu. Pero si librina cayta puedirga libri cawacunayquipagcagta ama perditinquitsu. ²²Pero pipis juc runapa servignin esclävun caycaptin gayashga runaga, Señor Jesucristoman criyicunganpitam shongonchö libracashga runanö caycan. Tsaynöllam gayangan örachö libri caycag runacunapis, cananga Señor Jesucristopa servigninna cayanga. ²³Gamcunataga quiquin Dios Yaya Señor Jesucristopa alläpa chaniyog yawarninwan rantiyäshushga caycäyashuptiquiga, amana ni juc runapa servignin esclävunga cayaynatsu. ²⁴Tsaymi waugecuna y panicuna, Dios Yayapa puntanchö shumag cäsucurnin cawacuyay Dios Yaya gayayäshungayqui öra cada ünuta imanötapis tariyashungayquinölla.

²⁵Llapayqui soltëracagcunapagga manam ni ima mandacuyta Señor Jesucristopita chasquishcätsu. Pero Señor Jesucristo alläpa llaquipäcug cayninwan llapan yachayninta confiacamaptinmi, quiquipa yarpaynöpita niyashayqui. ²⁶Tsaymi cananga noga yarpä, cay junagcuna alläpa ajacunata päsangantsicpitaga, canan imanöpis caycäyangayquinölla shumag cawacuyänayquita. ²⁷Casaracushgana caycarga ama warmiquita ni ollgoyquita dejarnin raquicaytsu. Tsaynölla manarag warminnag japallayquillarag cawacurga ama warmiqui ashinquitsu. ²⁸Pero gamcuna jöven o jipashllarag casaracurga manam jutsatatsu rurayanqui. Tsaynö caycaptinpis casädocagcunaga tucuyläya problëmacuna shamuptin, mana alli päsar cawayänayquitam nogaga munätsu.

²⁹Waugecuna y panicuna, cayta niyayniquitam munä alläpa ichicllana

cay tiempu faltämashga. Tsaymi cananpitaga llapan casädocagcunaga imayca mana casädonölla Dios Yayallapagga shumag cawacuyätsun. ³⁰Llapan mantsacaywan llaquishga caycagcunapis, Dios Yayallawan imayca juc alli fiestachö cushishganö cawacuyätsun. Tsaynölla canan fiestachö cushishga caycagcunapis, mantsacashga llaquicuychö cawacuyätsun. Imaycata rantigcunapis mana imannag wactsanö cawacuyätsun. ³¹Canan cay munduchö tucuyläya imaycata provechashgacunapis mana ayrajarnin ni imata provechagnölla cawacuyätsun. Cay munduga llapan imaycanwan jancat ushacänanpagmam caycan.

³²Nogaga alläpam munä gamcuna llapan imayca yarpachacuyacunapita libri cawacuyänayquita. Llapan soltërucagcunaga Señor Jesucristopa llapan aruyninpag yarpachacur, pay munangannölla shumag cawacuyta puedin. ³³Pero casädocagcunaga cay patsachö imaycatapis tariyänanpag yarpachacur cayan, warminta cushitsinanpag. ³⁴Tsaynöpam juc casädo runaga ishcayläyaman yarpänan Dios Yayata y warminta cushitsinanpag. Tsay quiquillan cawacug warmiga cuerpunwan alman Dios Yayapa canganta yarparnin, payta servir jutsannag shumag cawacutsun. Pero casäda warmiga cay patsachö imatapis tarinanpagwan gojanta cushitsinanpag yarpan. ³⁵Caycunataga niyag manam amatsayarniquitsu, sinöga bienniquicunapag plëtuyarniquim. Tsaynöllam niyag llapan shongoyquicunawan Señor Jesucristollatana servirnin, llapan junagcunachöpis allillata rurar shumag cawacuyänayquipag.

³⁶Si juc ollgo mana allita ruraycanganta yarparnin yashgana jipashwan täcuyta

munarga, mejorga casaracutsun mana jutsata rurananpag. Tsaynö ishcan rasumpa casaracurga manam jutsatatsu rurayanga. ³⁷Pero si maygan ollgopis quiquinpa munayninta controlacur shongonchö alli yarpayyog cayninwan quiquillan libri cacuyta munarga, tsay jipashwan ama casarangatsu. Tsaynö shumag mana jutsata rurarnin quiquillan cacunganga allim canga. ³⁸Tsaynömi pipis rasumpa casaracurga allita ruraycan. Pero tsaynö casaracungapitapis mas alliga cangan, quiquillan shumag cawacunganmi.

³⁹Casäda warmiga gojan cawaycaptinllaragga paypa mandädunchömi shumag cawacunan. Pero gojan wañusquiptinmi sïga, libri quëdasquir pï munanganwanpis casaracuyta puedir, rasumpa criyicugllawan casaracutsun. ⁴⁰Nogapitagam mas mejor canman manana yapay jucwan casaracurnin quiquillan cushishga cawacur. Caycunata quiquiipa yarpaylläpitam niyag, nogachö Dios Yayapa Espiritu Santon canganta musyarnin.

İdolocunaman churayangan micuycuna

8 ¹Canan niyëshayqui respetar micuycunata idolocunaman churayanganpag. Rasuncagtagam llapantsicpis yachayyog cantsic. Tsay yachaynintsicmi allishtucug orgullösomanpis chäsimantsic. Pero llapan runamajintsicwan cuyanacurmi, mas firmi criyicuyänanpag yanapantsic. ²Si pipis, “Nogaga llapan imaycatam yacharnin musyä” nir parlarga, manam rasumpacagtaga ni imatapis musyantsu. ³Pero pipis Dios Yayata rasumpa cuyarnin cäsuptinga, Dios Yayapis tsay runataga rasumpam regen.

⁴İdolocunata ofrecernin churayangan micuycunaga manam ni imapagpis

servintsu, musyantsicmi tsay idolocunaga poderninnag cayangata, juc japallan poderöso Dios Yaya captin.

⁵Tsaynöllam cieluchöwan cay patsachöpis atscag diostucugcuna cayan. Tsaynö rasumpa carga, maytsicag dioscunawan señorcunach cayanman. ⁶Pero nogantsicpaga manam masga juc diosnintsic cantsu, juc japallan Tayta Dios Yayapitaga. Juc japallan Dios Yaya llapan imaycata camashga captinmi, nogantsicpis payllapagna cawantsic. Tsaynöllam juc japallan Señor Jesucristopis cay munduchö llapan imaycata camashga captin, payllawan nogantsicpis cawacuntsic.

⁷Pero manam llapan runacunatsu caycunata musyarnin entendiyan. Tsay idolocunata adorag yachacashga runacunaga, tsay micuycuna idolocunaman ofrecer churayangantam yarpäyan. Tsay runacunapa concienciancuna alläpa débil carmi, tsay micuyta micuyanganpita jutsawan tallucashga cayanganta yarpätsin. ⁸Pero micuycuna micungantsicpitaga Dios Yaya manam chasquimëshuntsu ni tsayta micurpis mejortsu ni peortsu cawashun.

⁹Tsaynö caycaptinpis cuidädu cayanqui, tsay libri cayniquicunawantag manarag rasumpa firmi criyicugcunata jutsaman ishquitsiyanquiman. ¹⁰Si tsaynö rasumpa musyaycar idolocunaman churayangan micuyta micugta ricëshurniquim, tsayrag criyicuyag waueyquiga allish canganta yarparnin idolocunaman churayangan micuycunata micur yarpayninchö jutsata ruranga. ¹¹Allish yachayniquiwan llapanta musyar imatapis rurangayquiwantag, tsayrag criyicuyag waueyquita jutsaman ishquitsinquiman, Señor Jesucristopis payraycu wañushga caycaptin. ¹²Tsaynö

manarag firmi criyicug
 waueyquicunapa contran, mana allita
 rurar yarpayninta jutsawan
 tallucätsirninga, quiquiucunam Señor
 Jesucristopa contran jutsata
 ruraycäyanqui. ¹³Tsaymi micungäwan
 tsayrag criyicuycag waugëta mana
 alliman ishquitsignö jutsata ruratsirga,
 mejorga ni imaypis aysata micümantsu,
 tsayrag criyicuycag waugëta jutsaman
 mana ishquitsinäpag.

Apostolpa derëchuncuna

9 ¹¿Manacu libri cä? ¿Manacu
 apostol cä? ¿Nogaga manacu Señor
 Jesucristota ricashcä? ¿Manacu
 gamcuna Señor Jesucristoman firmi
 criyicyänayquipag yachatsiyangag
 musyatsicushga, paypa aruyninta
 arurnin cumplingä? ²Derepentich
 waquinga apostol cangäta
 regeyämantsu. ¡Pero gamcunam sïga
 Señor Jesucristopa apostolnin cangäta
 musyarnin rasumpa regeyämankui!
 Gamcuna llapayqui Señor Jesucristoman
 firmi criyicyayangayquim apostol
 cangäta rasumpa musyatsicun.

³Caynömi contestä tsay rimayämarni
 parlagcunata: ⁴¿Acäsu manacu
 derëchucuna can, micuyänäpagwan
 upyayänäpagpis? ⁵¿Manacu derëchü
 can nogapis criyicug warmiwan
 casaranäpag, waquincag
 apostolcunawan Señor Jesucristopa
 waugencunanö y Pedropis
 casarangannö? ⁶¿O Bernabewan
 ishcäcunallacu imaycäcuna faltagpagpis
 quiquicunapa maquicunawan obligädu
 alli aruyänä?

⁷¿Maygan soldäduwan quiquinpa
 gastunta pägacur ejercituchö servicun?
 ¿Maygan murucug runatan chacranchö
 alli arurnin üvata murusquir mana

micuntsu? ¿Maygan mitsicugtan wäta
 wätanganpa lichenllatapis gapirnin
 mana upuntsu? ⁸Ama yarpäyaytsu cay
 llapan niyangagcunaga quiquipa
 yarpayllapita canganta. ¿Manacu unay
 Moisés gellgangan leypis caycunapag
 unaypitana willacurgan? ⁹Moisés
 gellgangan leychömi nirgan: “Triguta
 trillar jarutsingayqui bueyispa shiminta
 ama jaquimawan watanquitsu mana
 micunanpag” ¿Acäsu Dios Yayaga
 bueyiscunallapagcu yarpachacurgan?
¹⁰¿O nogantsicpagpis yarpachacurcu
 tsaynö nirgan? Tsaynöga
 nogantsicraycum nirgan, chacrachö
 llapan arurnin yapyagcunawan
 trillagcunapis, cushishga shuyarar
 cosëcha öra iwälla ishcan
 chasquiyänanpag. ¹¹Si nogacuna imayca
 murucugnö shongoyquicunachö firmi
 criyicyänayquipag yachatsiyangapita,
 ¿alläpa ajacu canman gamcunapita
 cosechagnö imallatapis
 chasquiyänäpag? ¹²Si waquincagcuna
 imaycawan yanapayänayquipag
 derëchuyog caycäyaptinga, ¿manatsurang
 nogacunapaga imaycallawanpis
 yanapayämänayquipag mas
 derëchucuna canman?

Pero tsaynö yanapayämänayquipag
 derëchücuna caycaptinpis, manam
 gamcunapitaga ni imatapis
 garayämänayquipag mañayargagtsu.
 Tsaynö imatapis garädu mañayangagpa
 rantinmi, llapan imaycata awantarpis
 Señor Jesucristopa Alli Willacuyñinta
 mana dejaypa willacuyargä, mana ni
 ima amatsayäshuaptiqui rasumpa firmi
 criyicyänayquipag. ¹³¿Manacu
 musyayanqui templuchö servicurnin
 arugcunaga, tsay templuman
 garayanganta micurnin cayanganta?
 Tsaynölla ¿manacu musyayanqui

templupa altarninchö atenciducunapis, altarman imayca churayangancunata allicösa micur cayanganta?

¹⁴Tsaynöllam Señor Jesucristopis dispönishga pipis rasumpacag salvaciunpag Alli Willacuyñinta willacurga, tsaynö willacug canganpita imaycallawanpis yanapayaptin allish cawacunanpag.

¹⁵Pero nogaga manam ni maygancag deréchutapis ashishcätsu. Tsaymi cartächöpis caycunapagga gellgamütsu imatapis mana garayämänayquita munar. Caynö mana obracurlla alläpa cushishga Señor Jesucristopa Alli Willacuyñinta willacuyangäta manarag ni pipis gechumanganyag mejorga wañucüman. ¹⁶Tsaynö caycaptipis Señor Jesucristopa salvacug Alli Willacuyñinta willacungäga manam aläbacur willacunäpagtsu. Mas bienmi tsay Alli Willacuyta willacunäpagga obligacionni. ¡Pero allau noga cay rasumpacag Alli Willacuyta mana willacuptiga! ¹⁷Tsaymi nogaga quiquiüpa voluntäniwan rasumpa willacurnin yachatsicurgä, Dios Yayapita jatun garayta cushishga chasquinäpag. Y si nogata obligayämaptinlla yachatsicurninga, mandarnin encargayämanganllatam cumplirnín yachatsicüman cargan. ¹⁸¿Tsaypunga maygantan nogapa rasumpacag recompensäga? Dios Yayapa Alli Willacuyñintaga alläpa cushishga willacurmi purishag, mana pitapis ni ima pägata mañarnin aunqui waquincag yachatsicugcunapanö deréchü caycaptinpis.

¹⁹Mana ni pipa esclävun libri caycarpis, llapan marcacunachö serviyäshugniqui esclävuyquicunam ticrashcä, Señor Jesucristoman rasumpa criyicuyänanpag llapan runacunata gorinäraycu. ²⁰Judiucunawan pagta

cawarmi nogapis judiucunanö portacurgä, Señor Jesucristoman criyicuyänanraycu. Tsaynömi Moiséspa leynin mandacunganta cumplirnín pagtancuna cumplirnín cawargä, aunqui tsay leycunapita libri caycarpis.

Tsaynöga cawargä, tsay leypa mandacuyñinta cumplir cawagcunata Señor Jesucristoman criyicatsirnín salvanäraycum. ²¹Tsaynöllam Moiséspa leynin mandacunganchö mana cawag runacunawanpis pagta cawargä, aunqui Dios Yayapa mandacuyñinchö Señor Jesucristopa cuyacuy leyninta cumplirnín cawaycarpis, paycunata Dios Yayapa Mandacuy Reynonman pushanäraycu. ²²Criyicuyñincunachö débíl caycagcunawanpis pagtancunam débíl cargä, Señor Jesucristoman rasumpa criyicuyänanraycu. Tsaynömi nogaga llapanwanpis pagta paycunanölla cawacurgä, imaycanö waquillantapis Señor Jesucristoman criyicatsipti salvacüyänanraycu.

²³Caycuna llapanam Señor Jesucristopa Alli Willacuyñinraycu ruraycä, tsay Alli Willacuywan llapan bendiciunninta chasquinäpag.

²⁴¿Manacu musyayanqui juc llallinacur aywaychö juc gänagcaglla premiuta chasquinganta? Tsaynölla gamcunapis llapayqui llallinacugnörög Señor Jesucristoman aywayay premiuta chasquiyänayquipag. ²⁵Pelöta jaytaychö allish pucllagcunaga, mas allish pucllayänanpagmi alli entrenarnin prevenicuyan. Tsaynöga entrenayan alli pucllarnin llapanta gänasquir laurelpita rurashga corönata chasquiyänanpagmi. Tsay laurelpita coröna gänayanganga sasllam tsaquirnín ushacasquin. Pero nogantsicmi sīga imayca lüchagnörög entrenacuyantsic mana tsaquirnín ushacag premiuta chasquir, imayyagpis gloriachö cawacunanpag. ²⁶Tsaymi

nogaga mana ricchacur cörrignötsu cörrirnin aywä ni imayca wayrallata cutarnin maganacugnötsu cä. ²⁷Tsaynö cangäpa rantinmi nogaga cuerpüta castigar obligä, juc esclävünö rasumpa cäsümänapag. Tsaynöga rurä llapan runacunata yachatsirnin willacungäpita, jutsaman shicwar imayca cörriyar ishquigtanö Dios Yaya mana descalificäyämänapagmi.

İdolocunapag alverticungan

10 ¹Wagecuna y panicuna, nogaga manam mana musyayänayquita munätsu, unaycag aylluntsiccunata Dios Yaya mana ni ima peligrüwan päsatsinganta. Paycunamanmi juc pucutayta cachamur tsapascatsirnin, lamar rurinpa päsatsirgan. ²Tsay lamarpa päsarmi pucutaypa gopincho Moiséswan pagta llapanpis imayca bautizacashganö cayargan. ³Paycunaga juc milagru micuytam Dios Yayapita chasquisquir, tsay micuyllata llapan micuyargan. ⁴Tsaynöllam llapan aywagcunapis juc milagru yacu upyayangallanta upyayargan. Paycunaga viäjincunachö juc gagapita yargamug yacutam upyayargan. Tsaynö compañar pushagnincuna cawatsicug gagawan yargamug yacuga quiquin Señor Jesucristom cargan. ⁵Tsaynö caycaptinpis cäsi llapanmi Dios Yayata gustargantsu. Tsaymi tsay Israel casta runacuna cäsi llapan mana ni imacag tsunyachö wañurnin ushacar cuerpuncunapis mashtararrag quëdargan.

⁶Tsaycuna llapanmi imayca juc alvertincianö nogantsicpag päsargan, paycuna mana allicunata rurayangannöga nogantsicpis mana

allicunata manana munapänapag. ⁷Tsaymi gamcunaga ama tsay idolocunataga adorayaytsu, paycunachö waquincagcuna adorayangannöga. Tsaypagmi Diospa Palabran gellgashgachö nirgan: “Llapan runacunam jamayargan micuyänanpag y upyayänanpag, tsaypita sharcurnam alläpa cushishga fiestata rurarnin lluta mana allicunata rurarnin cayargan.”

⁸Nogantsicga ama jucnin jucninwan mana allicunata rurar puricushuntsu, paycunachö waquincagcuna ruracäyangannöga. Tsaynö mana allicunata ruracäyanganpitam juc junagllachö ishca y chunca quimsa waranga (23,000) wañuyargan. ⁹Ama paycunachö waquincagcuna Dios Yayata pruebagnö rurayangannöga cashuntsu. Tsay pruebagnincag runacunam culebracuna caniptin juc junagllachö wañurnin ushacäyargan. ¹⁰Ama ni imatapis Dios Yayapa contran rimarnin parlashuntsu, paycunachö waquincagcuna mana allicunata parlar rimayangannöga. Tsaynö rabiarnin parlaycachar rimayanganpitam, Dios Yaya wañutsicug angelta cachamurgan rimagnincunata wañutsinanpag.

¹¹Tsaycunaga llapanmi päsargan, imayca juc ejemplucunanö. Tsaymi Diospa Palabranchö gellgashga cargan, nogantsicpag juc alverticugcunanö canan ultimucag tiempucuna nogantsicman chaycämuptinna.

¹²Tsaymi si pipis, “Firmim criyicuycä” nirga, shumag cuidacutsun jutsaman mana ishquinanpag. ¹³Gamcuna tucuyläya pruebacunatawan tentacioncuna päsayangayquiga, llapan runacuna päsayangannöllam. Tsaynöpam imaypis Dios Yayaman rasumpa confiacuyta pueidianqui,

payga manam ni ima pruebacunaman ni jutsaman shicwayänayquita munangatsu mana awantayangayquiyagga. Tsaypa rantinmi quiquin Dios Yaya yanapayäshunqui pruebacunawan tentacioncuna chämuptin, imaycatapis allish awantanayquipag.

**İdolocunata adoray fiestacunawan
Señor Jesucristopa merienda
micuyinin**

¹⁴Tsaymi cuyashga waugecuna y panicuna, idolocuna adorayangayquita dëjasquir witicuyay. ¹⁵Caycunataga alli yachayyog runacunatam niyag, llapan niyangagcuna alli o mana alli canganta quiquiucuna juzgayta puediyaptiqui. ¹⁶Si nogantsic juc sagrädu cöpallapita Dios Yayata alabarnin agradëcicusquir upyarga, Señor Jesucristowanmi juclayllanö tigrantsic yawarninraycu. Tsaynöllam tsay tantallata bendisarnin paquisquir micurpis, Señor Jesucristowan juclayllanö tigrantsic cuerpunta chasquingantsicraycu. ¹⁷Aunqui maytsicag runacuna carpis, juc tantallatam micuntsic. Tsaynöpam llapantsic maytsicag carpis, juc cuerpulla cantsic.

¹⁸Masqui shumag tantiyayay Israel marca runacunapag: Tsay Israel marca runacunaga templupa altarninman sacrificiuta rurar churayangan micuycunata micuyanganpitam, tsay sacrificiucunawan Dios Yaya perdonarnin jutsannagtanö chasquirgan. ¹⁹Tsaynöllam mana criyicug runacunapis idolocunaman micuycunata churayan. Tsaymi tsay idolocunaga ni ima poderyogtsu ni churayangan micuycunapis manam alläpa allicag micuytsu. Gamcuna

musyayangayquinöpis tsaycunaga llapanpis mana imapag servigllam cayan. ²⁰Nogaga caynö niyayniquitam munä: Tsay idolocunata ofrecernin churagcunaga manam Dios Yayatatsu alabaycayan, sinöga quiquin supaycunatam ofreceycayan. Tsaymi nogaga munätsu supaycunawan tallucarnin gamcunapis cayänayquita. ²¹Señor Jesucristopa sagrädu cöpanpita upyaycarga, manam supaycunaga cöpanpitaga upyashwantsu. Tsaynöllam Señor Jesucristopa cuerpuntawan yawarninta chasquiyacarga, supaycunapa mësanman churashgataga ni imaypis chasquishwantsu.

²²¿Nogantsicga Señor Jesucristo chiquicurnin canantacu munantsic? ¿Acäsu nogantsicga paypita mascu cantsic?

**Llapan criyicugcuna libri
cawacuyangan**

²³Waquincagcuna niyangannömi, “Llapan imaycatapis ruraytaga pue dintsicmi.” Pero llapan imayca ruragantsicga manam allillatsu. Tsaynöllam, “Llapan imayca munangantsictapis rurayta pue dintsic.” Pero manam llapan rurangantsicstu nogantsicpa biennintsicga. ²⁴Ama quiquintsicpa biennintsicllaga ashishuntsu, sinöga llapan runamajintsicpa biennin imaycatapis ashishun.

²⁵Gamcunaga mercädochö ranticuyangan llapan aytsacunata micuyanqui, yarpayniqicuna mana allita yarpaptin maypita apayämungantapis mana tapupacurnin. ²⁶Tsaypagmi Diospa Palabran gellgashgachö nirgan: “Cay llapan entëru munduwan, tsaychö llapan imayca ricangantsicunaga japallan Señorpan.”

²⁷Si juc mana criyicug runa wajinman invitayashuptiqui aywarga, llapan imayca garayashungayquita mana tapuparlla llapanta micuyanqui. Ama tapupäyanquitsu yarpayniquicuna mana allita yarpapin, maypita apayämungantapis. ²⁸Pero si tsaychö pipis: “Cay aytasaga sacrificiuchö idolocunata ofreceyanganmi” niyashuptiquiga ama micuyanquitsu. Tsayta mana micuyaptiquim, willayashugniqui runacunapis yarpaynincunachö llutan mana allacunata gamcunapag mana yarpäyangatsu. ²⁹Caycunata niyag manam gamcunapa yarpayniquicunapagtsu, sinöga tsay willayashugniquicuna gamcunapag mana allacunata mana yarpäyanpagmi. ¿Imanötan quiquiipa concienciätawan libri cangäta juzgacüman, juc runacunapa conciencianchö yarpayninwan? ³⁰Si cushishga imatapis micurnin agradécicuycaptiga ¿imanörag micungäpita acusar musyapäyamanman Dios Yayata agradécicuycaptiga?

³¹Tsaynö caycaptinpis imaycata micurnin, upyar, imaycacunata rurarpis Dios Yayata respetarnin cushitsiyänayquipag rurayanqui. ³²Ama ni pitapis mana alli ejemplutaga goyanquitsu, judiucunatawan mana judiucagcunatapis ni goricaycur Dios Yayaman mañacugcunaman juntawacagcunatapis. ³³Noganö allacunallata rurayay, llapan imaycachöpis Dios Yayata alläpa respetarnin cushitsingänö. Tsaynö quiquiipa bienni mana ashirmi, atscag runacunapa biennin ashycä, rasumpacag salvacunata tariyänanpag.

11 ¹Señor Jesucristopa ejemplunta sigingänö, gamcunapis nogapa ejempluta sigiyay.

**Dios Yayaman imanö
mañacuyänanpag alverticuy**

²Wagecuna y panicuna, alläpa cushicurmi aläbar felicitäyag imaypis

nogapag yarpäyamar, yachatsiyangagnölla llapanta sigiyäyangayquita. ³Tsaymi cananga gamcuna shumag entendiyämänayquita munä, Señor Jesucristo llapan runacunapa mandagnin uman cuenta canganta. Tsaynöllam juc ollgopis warminpa uman cuenta mandagnin, imayca Dios Yaya Señor Jesucristopa mandagnin uman cuenta cangannö. ⁴Pi ollgopis Dios Yayaman mañacurnin o willacurga, ama warmicunanö umanta tsapäcungatsu. Si tsay warmicunanö umanta tsapäcurga, Señor Jesucristo mandagnin umannö captinmi alläpa pengacatsir desonran. ⁵Tsaynö caycaptinga pi warmipis Dios Yayaman mañacurnin o willacurga, umanta tsapäcutsun. Si umanta mana tsapäcurga imayca agtsan rutushganö carmi, gojanta alläpa pengacuyman churanga mandagnin uman cuenta captin. ⁶Si juc warmi goricaycurnin Dios Yayaman mañacuyanganchö umanta mana tsapäcurga, mejorga llapan agtsanta ollgopatanö rutusquitsun. Si tsaynö pengacuypag rutushga cayta mana munarga, umanta shumag tsapäcutsun. ⁷Ollgocagcunaga ama umancunata tsapacuyätsuntsu, paycunaga quiquin Dios Yayapa reträtun caynincunawanmi, cushicuypag atsiyag poderninta musyatsicuyan. Pero warmicunam siga, ollgopa reträtunnö car, ollgo imanö canganta musyatsicuyan. ⁸Dios Yayaga manam warmipitatsu ollgota camargan, sinöga ollgopa costillanpitam warmita camargan. ⁹Ollgotaga Dios Yaya manam warmipagtsu camargan, mas bienmi warmita ollgopag camargan. ¹⁰Tsaynö canganpitawan angelcunaraycum, warmiga imayca umanchö señalta catsignö gojanta cäsurnin shumag cawacutsun.

¹¹Pero tsaynö captinpis Señor Jesucristoman criyicuy vidachöga, manam juc warmi mana ollgonnag libra canmantsu. Tsaynöllam ollgopis libri mana warminnagga canmantsu.

¹²Musyangansticnöpis ollgopa costillanpitam Dios Yaya warmita camargan. Tsaynöllam ollgocupis warmipitarag yuriyashga. Tsaymi llapan imaycapis quiquin Dios Yayallapita shamun. ¹³Gamcunana tsaytaga imanöpis juzgayay: ¿Allicu canman juc warmi umanta mana tsapäcur Dios Yayaman mañacungan? ¹⁴¿Acäsu manacu canan tiempu costumbriga yachatsimantsic, juc ollgopa alläpa jatusag agtsan carga pengacuypag canganta, ¹⁵warmipagmi sïga shumag cushicuypag jatusag agtsan cangan? Tsaypagmi warmitaga quiquin Dios Yaya jatusag agtsancuna garashga umanta tsapänanpag. ¹⁶Si pipis caycunapag imatapis discutiucuya munarga, musyatsun Dios Yayaman llapantsic criyicugcunaga jucläya costumbricunata mana chasquingantsicta.

Micupacuyanganchö lluta mana allicunata ruracayangán

¹⁷Cay cartata gellgamur manam aläbayayniquita pueditsu, allicag ruraycunata rurayangayquipa rantin, llapayqui micuyänayquipag goricayangayquichö alläpa mana alli captin. ¹⁸Unaynam willayämashga Dios Yayaman mañacuyänayquipag goricayangayquichö, quiquiucuna pura raquicarnin caycayangayquita. Tsaynö willayämangan gamcunachö rasumpa päsaycangantam criyirnin yarpaycä. ¹⁹iRasuncagtaga quiquiucuna purallam yarpayniucunawan raquicar caycayanqui! iTsaynö raquicarnin

caycayanqui, maygayquipis rasumpa firmi criyicur Dios Yayawan alli cawacuyaygayquita musyayänanpagmi! ²⁰Tsaynö raquicar cayaptiquiga, goricarcurnin Señor Jesucristowan pagta micugnö cayangayquipis, mananam Señor Jesucristopa pagta micuyanquinatsu. ²¹Gamcuna micuyangayquichömi waquincagcunaga cada ünu punta puntata achcuscuir alläpa micupacuyan. Tsaymi waquincagtaga mallagaycagta dëjasquir, asta machayanganyag upyapacuyan. ²²¿Acäsu manacu juclächö wajiucuna can alli micucuyänayquipag y upyarnin machayangayquipag? ¿Imanirtan Dios Yayaman criyicugcunataga despreciarnin, mana imannagcag wactsacunatapis pengacatsiyanqui? ¿Tsaynö rurayangayquipitaga ima nishagtan? ¿Imanörag aläbayagman gamcuna tsaynö mana allicunata rurayangayquipita? iManam aläbayäshayquitsu!

Señor Jesucristowan pagta micugnö cayangan

(Mateo 26.26-29; Marcos 14.22-25; Lucas 22.14-20)

²³Tsaymi nogapis quiquin Señor Jesucristopita chasquirgä, cay Alli Willacuyninta yachatsicur willayangagta. Señor Jesucristota traicionayangan pagasmi, maquinwan tantata achcurcur, ²⁴Dios Yayaman mañacurnin agradëcicur paquisquir nirgan: “Cay tantam nogapa cuerpi, gamcunapa bienniucuna wañunanpag entregashga canga. Caynö gamcunapis rurayanqui, nogata imaypis yarpäyamarni.” ²⁵Tsaynöllam micur ushasquirnin, cöpata maquinwan achcurcur nirgan: “Cay cöpachö yawarniwanmi, Dios Yayawan gamcunapag juc mushog conträtuta

rurashcă. Tsaymi cada vez yarpäyämarni upyar caynö rurayanqui.”
²⁶Tsaynöllä cada vez cay tantata micurnin y cöpachö upyarnin, asta Señor Jesucristo cutimungan junagyag paypa wañuyñinta willacucyăyanqui.

**Señor Jesucristowan pagta
caycagnö imanö micuna cangan**

²⁷Tsaymi pipis Señor Jesucristopita tantata micur y cöpanchö upyaycar Dios Yayata mana alabarnin llutan mana allícunata rurarga, alläpa jatun jutsatan ruraycan Señor Jesucristopa cuerpunpawan yawarninpa contran.
²⁸Cada ünüm concienciancunachö shumag yarpachacur tantiyacuyănan, Señor Jesucristopa cuerpuntawan yawarninta manarag chasquirnin.
²⁹Pero pipis Señor Jesucristopa cuerpuntawan yawarninta micurnin upyayta munarga, llapan jutsanpitam arepenticunan. Si jutsanta mana arepenticur Señor Jesucristo imapag wañunganta mana musyaycar micurnin upyarga quiquillanmi condenacunga.
³⁰Tsaymi gamcunachö waquincagcuna mana allícunata rurar micuyanganpita callpannagnö alläpa débil geshyagyasha caycăyan. Tsaynöllam waquincagpis mana allícunata rurayanganpita wañurnin ushacăyashga. ³¹Si quiquintsic shumag yarpachacurnin arepenticushgaga, Dios Yayapis manam mantsacaypag castigamăshuntsu. ³²Pero Dios Yayaga juzgarnin castigamantsic quiquintsic yachacunapagmi, cay patsachö jutsata ruragcunawan pagta condenacarnin infiernuman mana aywanapag.

³³Tsaymi cuyashga waugecuna y panicuna, llapayqui goricaycur micuyănayqui captinpis, llapan chăyămunganyag jucnin jucninwanpis shuyănacuyanqui. ³⁴Si mayganpis alläpa

mallagarga wajinllachöna micucarcamunga, manarag llapan goricăyaptin micunganpita Dios Yaya mana castigananpag.

Gamcunacagpa quiqui ricagniquicuna shamurnam, waquincag asuntucunapag consejar entenditsiyăshayqui.

**Espiritu Santo tucuyläya yachayta
garamangantsic**

12 ¹Waugecuna y panicuna, Espiritu Santo poderninwan tucuyläya yachayniquicuna garayăshungayquita shumag entediyanayquitam mună. ²Gamcunaga musyayanquim cay mundupa costumbricunallachö cawar manarag criyicuyaptiqui, mana ni ima musyag ni ima parlag idolocunata adorayănayquipag imayca garachagnö fácil apayăshungayquita. ³Tsaymi canan rasumpa alvertiyag, Espiritu Santopa poderninwan cawarga ni pipis “iSeñor Jesucristoga alläpa mana allim!” nir parlananpag. Tsaynöllam ni pipis rasumpa ninmantsu: “iJesucristoga Señornimi!” nir, Dios Yaya Espiritu Santunpa poderninwan mana yanapapinga.

⁴Tsaymi rasumpa maygan criyicugpis tucuyläya allish yachaycunata chasquin, pero tsay llapan yachaycuna chasquinganga juc Espiritu Santollapitam shamun. ⁵Tsaynöllam tucuyläyapa servinapagpis can, pero tsaynö tucuyläyapa servirpis juc japallan Señor Jesucristollatam servinantsic. ⁶Tucuyläyata rurarnin mandacuyyog canapagpis canmi, pero Dios Yayallam tsay llapan imayca ruraycunatapis rurashga.

⁷Cada ünutam Dios Yayaga llapan yachaynintsicunata garamashcantsic, Espiritu Santopa yanapacuyñinwan criyicugmajintsicunata yanapanapag.

⁸Tsaynö rasumpa juc runapa shongonchö Espiritu Santo captinmi, tsay runaga alläpa yachayninwan imatapis parlan. Tsaynöllam waquincag runacunatapis quiquin Espiritu Santo poderninwan, llapan musyaycunata tantiyatsirnin entenditsinga. ⁹Tsay Espiritu Santollapitam waquincagga alli firmi criyicuynincuna chasquian. Waquincagnam Espiritu Santopa poderninta geshyagyashacunata cuticätsiyänapag chasquian. ¹⁰Waquincagnam milagrucunata rurayänapag Dios Yayapita poderta chasquian y waquincagnam poderta chasquian quiquin Dios Yayapita rasumpacag Alli Willacuy chasquiyanganta allish willacuyänapag. Tsaynöllam waquincag criyicugcunatapis Dios Yaya poderninta garashga, rasumpacag Espiritu o mana allicag espíritu canganta regeyänapag. Waquincagnam podernincuna garashga tucuyläya idiomacuna parlayta yachayänapag. Tsaynöllam waquincagtapis mas yachaynincuna garashga tucuyläya idiomacunachö parlangantapis, alli yachayninwan rasumpa entendir musyatsicunapag. ¹¹Pero tsay llapan imayca yachaynincunawan tucuyläya imaycata rurarpis, juc japallan Espiritu Santollam segun quiquin munangannölla cada ünuta gararnin entregashga.

**Juc cuerpu llapan partincunawan
juntawacashga cangan**

¹²Tsaynö captinpis, cuerpuga juc japallan caycarpis atasca partiyogmi. Tsaynö atasca partincuna caycaptinpis juc cuerpullachömi llapan juntawacashga cayan. Tsaynöllam Señor Jesucristopa cuerpunwanpis päsan. ¹³Tsaymi nogantsicga juc

Espiritu Santollawan bautizacashcantsic, juc cuerpunölla llapantsic canapag, judiu o griego, servicug y libri mana servicug carpis. Tsaynöllam imayca yacuta upyatsignö llapantsicga juc japallan Espiritu Santonta garamashcantsic.

¹⁴Tsaymi canan cuerpuga manam juc partillatsu, sinöga atasca partiyogmi. ¹⁵Si chaqui ninman: “Nogaga mana maqui carmi, cuerpupatsu cá” nir. ¿Tsaynö nirpis Acäsu cuerpuga partin canganpita camantsacanmancu? ¹⁶Si rinri ninman: “Nogaga mana ñawi carmi, cuerpupatsu cá.” ¿Tsaynö nirpis acäsu cuerpuga partin canganpita camantsacanmancu? ¹⁷Si llapan cuerpuntsic ñawilla captinga, ¿imanörag wiyayta puedishwan? Si tsaynölla llapan cuerpuntsic rinrilla captinga, ¿imanörag mushcuyta puedishwan? ¹⁸Pero rasuncagtaga mana tsaynö canapagmi, quiquin Dios Yaya cada ünuta sitiuncunaman churashga, llapanpis quiquin munangannölla shumag cayänapag. ¹⁹Si llapan cuerpu juc partiyoglla captinga, ¿imanörag tsay cuerpu canman? ²⁰Pero rasuncagtaga tsaynö atasca partiyog cuerpu carpis, juc japallanmi tsay cuerpuga.

²¹Tsaymi ñawiga maquita: “Manam wanagtsu” niyta puedintsu. Tsaynöllam umapis chaquita: “Manam wanagtsu” niyta puedintsu. ²²Tsaynö ninacuyanganpa rantinmi mas bien, imayca alläpa debilnöcag cuerpuntsicpa partincunarag mas wanacan. ²³Tsaynöpam cuerpuntsicchö mana cäsungantsic umildecagrag, imaycawan mas shumag respetarnin cuidantsic. Tsaynöllam mana ricäcag cuerpuntsicpa partincunataga, imaycallawanpis mas shumag tsapäcuyta munantsic. ²⁴Pero runacuna ricämänantsicag cuerpuntsicpa partincunataga manam tsapayta wanantsicstu, pïmaypis

ricämäna captin. Tsaymi Dios Yaya dispönishga tsay mana cäsungantsiccag cuerpuntsicpa partin, lapanpitapis allish cuidarnin mas respetashga cananpag. ²⁵Tsaynö dispönishga lapan cuerpuntsic pagta car, ni mayganpis mana raquicänanpag. Tsaynöpam lapan cuerpuntsic juccag partincunawan jucnin jucninwan llaquipänacurnin yanapacur shumag cawacuyanga. ²⁶Si cuerpupa juccag partin llaquicurnin sufriptinpis lapan waquincagcunapis iwalmi sufriyanga. Tsaynöllam cuerpupa juc partinta alläpa cuyarnin respetayaptinga, waquincag partincunapis lapan alläpa cushicuyanga.

²⁷Tsaymi gamcunaga Señor Jesucristopa rasumpa cawag cuerpun cayanqui. Tsaynö carmi paypa cuerpupa lapan partincuna llapayquipis cada ünu cayanqui. ²⁸Tsaynöllam quiquin Dios Yaya lapan criyicugcuna goricäyangan wajichöpis tucuyläya mandacuyyog cayänanpag churargan.

Puntatam churargan apostolcunata, tsaypa gepanmanmi Alli Willacuyninta willacug profëtacunata. Tsaycunapa gepancunamannam Diospa Palabranta willacur yachatsicugcunata churargan.

Tsaypitanam tucuyläya milagru ruragcunawan geshyagyashacunata cuticätsigcunatapis churargan. Tsaynöllam waquintapis churargan imaycachöpis yanapacug cayänanpag y waquincagtanam criyicugcunata mandarnin pushayänanpag. Waquincagtanam tucuyläya idiomacunata parlar yachacuyänanpag churargan. ²⁹¿Llapancu apostolcuna cayan? ¿Llapancu profëtacuna cayan? ¿Llapancu yachatsicug maestru cayan? ¿Llapancu milagrucunata rurayan?

³⁰¿Llapancu geshyagyashacunata

cuticätsiyänman? ¿Llapancu tucuyläya idiomacunata parlayan? ¿Llapancu tucuyläya idioma parlaycunata shumag entenditsicur musyatsicuyan? ³¹Pero gamcunaga mas allicag yachayniquicuna chasquiyänayquipag, imayca ayrajagnörag ashiyanqui.

Caymi rasumpa cuyanacur cawacuyga

Cananmi noga lapanpitapis mas allicag nänitano regetsiyäshayqui, Dios Yaya munangannö rasumpa shumag cawacuyänayquipag.

13 ¹Si maytsay naciunchö runacunapa parlaynintawan angelcunapa parlaynincunata yacharpis, runamajita mana cuyarga imayca mana servig fierro wagagwan ratay platillo mana alli chinignöllam cäman. ²Si noga Dios Yayapag alläpa allish willacur, paypa lapan yarpaynintawan yachayninta musyarnin, asta jircacunata jucläman witsinapäpag criyicuyniwan poderni captinpis, mana rasumpa cuyacur llaquipäcurga, mana imapag servigllam cäman. ³Tsaynöllam imayca capamagnita wactsacunata gararnin, Dios Yayaman criyicungäraycu quiquipa cuerpüta waycäyämänanpag entregacurnin wañurpis, rasumpa cuyacuyniwan llaquipäcuyni mana captinpa, tsaynö rurangäpis manam ni imapag välemanmansu Dios Yayapa puntanchöga.

⁴Si pipis rasumpa cuyacurnin llaquipäcurga, alli pacienciañwanmi runamajinta yanapan. Tsaymi ni imaypis runamajinta chiquintsu ni iman captinpis codiciacuntsu. Tsaynö rasumpa cuyacug runaga, manam ni imaypis aläbacurnin yachagtucur orgullösotsu cawacun. ⁵Tsaynö cawacug runaga manam ni imaypis mana allicunata parlantsu ni runamajinta

despreciantu ni imatapis quiquillanpagga ayrajarnin ashintu. Tsay runaga manam ni imaypis rencorta aparnin piñashgatsu puriycan, ni runamajincuna mana allicunata rurayangantapis yarparantsu. ⁶Rasumpa cuyacug runaga manam ni imaypis mana allicunapagga cushicuntsu, sinöga llapan imayca alli ruraycunapagmi sïga alläpa cushicun. ⁷Tsaynö cuyacuyyog runaga runamajinta cuidarnin tsapan, imaycatapis criyirnin rasumpa confiacur shuyaran, tucuyläya sufrimientucunatapis allish awantan.

⁸Tsaymi rasumpacag cuyacuywan llaquipäcuyga ni imaypis ushacangatsu. Aunqui llapan willacugcuna ushacäyaptinpis Dios Yayapa cuyacuyninga manam ni imay ushacangatsu. Tsaynöllam tucuyläya idiomacunachö parlagcunapis upällashga cayaptin, imayca yachayta yachagcunapis jancat ushacäyanga. ⁹Nogantsicpa yachaynintsic alläpa ichiclla captinmi, Dios Yayapa Palabrantapis waquillanta willacuntsic. ¹⁰Pero rasumpacag Alli Willacuyyog Señor Jesucristo cay patsaman cutimuptinmi, tsay waquillan mana allinöcag willacungantsic jancat ushacanga.

¹¹Noga wamranöllarag carga imayca pishi mana musyag wamranömi, parlargä, yarpargä, yarpaynïpis cargan. Pero cananmi sïga juc yashga runanö ticarnin, llapan wamranö caynicunata jancat dejashcä. ¹²Tsaynöpam cananga imayca juc espëju yagashgachönö tupapayllatana ricantsic, Dios Yayapita llapan rasumpacag shamugcunata. Pero juc junagchö sïga quiquin Dios Yayata cära cära rasumpa ricarnin regeshun. Tsaymi canan llapan musyangäcunaga imayca manacagnö waquillan. Pero tsay junagmi sïga rasumpa cläru musyarnin

regeshag, quiquin Dios Yaya shongöta regengannölla.

¹³Tsaynöpam caycuna quimsan ni imaypis mana ushacag cayanga: Rasumpa firmi criyicuy, confiacurnin shuyaray y rasumpa cuyacuy. Pero cay quimsanpitapis mas allicagga, llapan runamajintsicä alläpa llaquiparnin cuyangantsicmi.

Tucuyläya idiomacunachö parlarnin yachatsicucuna

14 ¹Gamcunaga imayca ayrajagnörag ashiyay runamajiquicunawan shumag cuyanacur cawacuytawan Espiritu Santopita tucuyläya yachacunawan ruraycunata chasquiyäshunayquipag. Tsaycunapitapis masga ashiyanqui Espiritu Santo poderninwan Diospa Palabranta yachatsicur willacuyänayquipag. ²Si juc runa mana yachangan parlaychö Espiritu Santopa poderninwan mañacurga, Dios Yayallatam parlaparnin mañacun. Tsaynö Dios Yayallata parlapaptinmi ni maygan runapis ni imata parlangantapis entendiantsu. Tsaymi waquincagcunaga tsay runa parlanganta musyayantsu, imayca pacaraycagnö yachayta Espiritu Santo yanapar parlatsiptin. ³Pero llapan runacuna yachayangan parlaycunachö Diospa Palabranta willacug runaga, yachatsicurni willacun llapan runamajincuna cada junag mas firmi criyicuyänanpag. Tsaynöllam runamajincunata imaycachöpis animatsirnin, llaquicuyincunachöpis yanapar consolan. ⁴Si pipis jucläya mana yachangan parlaychö mañacurga, quiquillanmi cada junag mas firmi criyicuyinichö cawacun. Pero pipis llapan runacuna yachayanganchö Diospa Palabranta yachatsicurnin

willacurga, llapan criyicugmajincunatam yanapan criyicuynincunachö mas firmi cawacuyänapag.

⁵Nogaga munämanmi llapayquipis jucläya mana yachayangayqui parlaychö parlayänayquita. Pero tsaypitapis masga munä, Diospa Palabran imayca pacaraycagnöta willacuyänayquitam. Jucläya mana yachayangan parlaycunachö parlarnin yachatsicuypitaga, mas allim canman yachayangan parlayllachö Diospa Palabranta willacurnin yachatsicuyangan. Pero si jucläya mana yachayangan parlaycunawan llapan criyicugcunata shumag tantiyatsirnin, llapan significäduncunata willar entenditsishgaga, tsaypis allillam canman. Tsaynö significädunta entenditsirnin willacushgam criyicug runacunapis criyicuynincunachö mas firmi cawacuyanga.

⁶Waugecuna y panicuna, canan shamurnin jucläya mana yachayangayqui parlaycunachö willayarniqui mana shumag esplicayaptigga, ñimapagtan serviyäshunquiman juc revelaciuncunata, allish yachaycunatawan musyaycunata, imayca pacaraycagnö Diospa Palabrantawan yachatsicuyincunata mana shumag esplicayaptigga? ⁷Masqui canan juc ejempluta niyäshayqui: Lautatawan arpata töcarnin juc nötaallachö mana cläru töcayaptinga, ñimanötan musyayanga imata töcaycayangantapis? ⁸Si juc trompëta töcag soldädu shumag mana cläru regecaypagta töcayaptinga, ñimaygan soldädutagshi musyanman guerraman peleag aywayänapag? ⁹Tsaynöllam gamcunawanpis päsan. Si jucläya mana yachayangan idiomachö parlarnin

yachatsicuyaptiquiga, ñimanörag imata yachatsiyangayquitapis entendianman? Tsaynö parlarga imayca wayrata parlapagnöllam caycäyanqui. ¹⁰iPitan musyan cay entëru munduchö ayca idiomacunata parlayanganta! Tsay idiomacuna parlayanganpa significädun captinmi, llapanpis allish entendican. ¹¹Pero si pipis quiquinpa idiomanchö parlapämaptin mana entendirga, imayca jucläpita shamushga forastërunömi paypag cäman. Tsaynöllam tsay runapis parlayniita mana yacharga, imayca jucläpita shamushga forastërunö nogapag canga. ¹²Tsaymi gamcunaga Espiritu Santopa poderninwan tucuyläya yachaycunata chasquiyänayquipag ayrajarnin munaycarga, tsay mas allicag yachaycunata ashirnin llapan criyicugcunata yanapayay mas firmi criyicuyänapag.

¹³Tsaynö captinmi, si juc runa mana regeshga parlaychö yachatsicurga, Dios Yayata mañacutsun llapan parlanganta esplicarnin shumag entenditsicunapag. ¹⁴Si noga tsaynö mana regeshga parlaychö Dios Yayaman mañacurga, rasumpam llapan shongöwan mañacuyan. Pero tsaynö mana regeshga parlaychö llapan shongonwan mañacurpis, manam ni imata entendimantsu. ¹⁵¿Tsaypunga imatatan ruräman? Dios Yayaman mana regeshga idiomachö llapan shongonwan mañacurpis, rasumpa yarpayniwanpis shumag entendir mañacüman. Tsaynöllam mana regeshga idiomachö llapan shongöwan cantarnin, rasumpa shumag yarpayniwanpis entendir cantäman. ¹⁶Si gam shongollayquichö Dios Yayata alabaptiqui, ñimanötan läduyquichö mana musyag runaga pagtayqui Dios Yayata “Tsaynö catsun” nir agradëcicunman, gam alläpa

agradëcicutquipis mana ni imata entendiycarga? ¹⁷Tsaynö mana regeshga parlaychö Dios Yayata agradëcicur mañacungayqui alläpa allish captinpis, läduyquichö caycag criyicugcuna mas firmi criyicuyänapagga manam yanapangatsu.

¹⁸Tsaymi nogaga Dios Yayata agradëcicü, llapayquicunapitapis mas tsay tucuyläya mana regeshga idiomata parlangäta. ¹⁹Pero tsaynö caycaptinpis nogagam munä, criyicugcuna goricäyanganchö yachatsicurga pitsga palabrallawanpis willacur shumag entenditsicuyta. Si jucläya mana regeyangan idiomachö mañacurnin mana entenditsicuptiga, çimapagtan serviman juc chunca waranga palabracunachö mañacuptipis?

²⁰Waugecuna y panicuna, ama gamcunapa yarpayniquicuna imayca juc pishi wamrapa yarpayninnölla catsuntsu. Gamicunaga imayca pishi mana ima musyag wamranö cayay, llutan mana alli yarpaycunapita. Pero rasumpacag alli yarpayniquicunawan imayca yashga runanö allillata rurarnin shumag cawacuyay. ²¹Dios Yaya gellgatsingan leychömi nirgan:

“Jucläpita mana regeshga
runacunapa parlaynincunawan
y jucläpita mana regeshga
forastërucunawanmi
cay marcata willacatsishag.
Pero tsaynö willacatsiptipis manam
wiyarnin
cäsuyämangatsu” ninmi Señorga.

²²Rasumpa criyicugcunapagga juclä mana regeshga parlaycunaga manam ni imapagpis servintsu. Pero tsay parlaycunaga mana criyicug runacunapagmi sïga allish servin. Tsaynöllam Dios Yayapa Palabranta

chasquishga willacugcunaga llapan criyicugcunapag wanacäyan. Pero tsay mana criyicugcunam sïga entendiantsu. ²³Tsaymi llapayqui criyicugcuna goricashga mana regeyangan parlaycunachö parlaycagman, mana musyagcunawan mana criyicugcuna yaycascamur, çlöcuyashgam caycäyan niyëshunqui? ²⁴Pero Dios Yayapita chasquiyangayqui yachatsicuy Palabranta shumag willanacurnin entenditsinacur caycagman, mana criyicugwan mana musyag runa yaycascamurga, quiquinmi tantiyacurnin yarpachacunga jutsasapa canganta. ²⁵Tsaynöpam Dios Palabranta wiyarnin, shongonchö jutsancunata pacarätsingantapis llapanta musyangan. Tsaynöpam Dios Yayata adorarnin gongorpacuycur ninga, “iRasumpam quiquin Dios Yaya gamcunachö caycan!” nirnin.

**Llapayqui goricaycurnin Dios
Yayaman mañacuyangayquichö
shumag cayanqui**

²⁶Tsaymi waugecuna y panicuna, nogaga çimatatan niyëshayqui? Llapayqui goricäyangayquichö cada ünu participäyanqui, immucunawan, alli yachatsicuycunawan o Dios Yaya revelar musyatsiyëshungayquiwan. Tsaynölla waquiquiga jucläya idiomachö imatapis willacurnin, tsay willacuyangayquipa significädunta shumag entenditsicuyanqui. Tsaynö llapanta rurayätsun, goricaycurnin Dios Yayaman mañacugcuna mas firmi criyicuyänapag. ²⁷Si juc mana regeshga idiomata parlarnin willacurga mas allim canman, ishcg o quimsag runacunalla cambianacurnin parlayanga. Tsaychö mana

entendiyaptinga juc runarag shumag willacur entenditsicunga. ²⁸Pero si llapayqui goricäyangayquichö mana ni pipis entenditsicuyta yachaptinga, mejorga ama juclä mana regeshga idiomachö parlayanquitsu. Sinöga cada ünu upällalla mana regeshga idiomawan shongoyquicunallachö Dios Yayata mañacuyanqui.

²⁹Tsaynölla Dios Yayapa willacugnin profëtaçuna willacurpis, ishçag o quimsag parlayanga. Tsay willacuyanganta wiyag runacunapis tapucuyanga rasumpa o mana rasumpa canganta. ³⁰Pero si pipis jamaycaptin Dios Yayapita revelarnin musyatsiptinga, puntachö parlaycag runaga upällanga jamaycag sharcurnin willacunanpag. ³¹Tsaynö shumag llapayqui si Dios Yayapita revelaciunta chasquirga o wiyarga, jucpa jucpa parlayanqui waquincagcunapis yachacur mas animacurnin firmi criyicuyänanpag. ³²Willacug profëtancunaga imaycachöpis mana piñaycachar shumag controlacurnin pacienciancunawan turnuncunata shuyäyanga. ³³Dios Yayataga manam lluta imaycatapis gayaycacharnin parlayga gustantsu, sinöga shumag ordenädu alli päsaçuchö cayänayquitam munan.

Tsaynö rasumpa criyicugcuna llapan goricäyanganchö costumbrintsicnö, ³⁴ama warmicuna parlarurlla cacuyänanta permütianquitsu. Llapayqui goricashga caycäyaptiquiga, warmicunaga mana parlarurlla shumag wiyacuyanga quiquin Dios Yaya mandacungannö cäsucurnin. ³⁵Si tsay warmicuna imatapis musyayta munayarga, wajincunaman chaycur gojancunata tapucuyanga. Manam allitsu goricaycur Dios Yayaman mañacuyangayqui öra, warmicuna

imatapis tapupacurnin parlaycachäyangan.

³⁶¿Acäsu Diospa Palabranga gamcunallachöcu gallarirgan? ¿O gamcunallacu Diospa Palabranta chasquiyargayqui? ³⁷Si pipis “Nogaga Diospa Palabranta willacunäpag profëtam cä” o “Espiritu Santopitam chasquishcä” nirga, musyatsun Señor Jesucristopa mandacuyinwan cay cartäcunata gellgamungäta. ³⁸Si tsay runa cay yachatsicuyta mana cäsucurnin chasquiptinga, ama quiquintapis cäsur chasquiyänquitsu.

³⁹Tsaymi alläpa cuyashga waugëcuna y panicuna, gamcunapis imayca ayräjagnörög procurayanqui Dios Yayapa Alli Willacuyininta shumag willacuyänayquipag. Tsaynölla ama ni pitapis amatsayanquitsu, jucläya mana regeshga idiomachö parlayaptinpis. ⁴⁰Pero caycunataga llapayqui mana gelanar, turnuyquicunata shuyararnin rasumpa allicagcunallata rurar shumag ordenädu cawacuyanqui.

Señor Jesucristo cawamungan

15 ¹Cananmi waugëcuna y panicuna, rasumpacag salvaciunpag Señor Jesucristopa Alli Willacuyininta willayangagta imaypis yarparäyänayquita munä. Gamcunaga tsay Alli Willacuyininta cushishga chasquirmi mas firmi criyicuyiniquicunachö alli tsaracur criyicuyänanqui. ²Tsaynöllam cay Alli Willacuyman rasumpa firmi criyicurnin alli tsaracur salvacashga caycäyanqui. Si criyicuyiniquicunachö firmi mana cawacuyaptiquiga, criyicuyangayquipis manam ni imapag vëlengatsu.

³Tsaymi imaycapitapis mas importanticag Dios Yayapa yachatsicuyin chasquingäta willayargag, Señor Jesucristo

jutsantsicraycu wañunganta, Diospa Palabran ningannö. ⁴Pampayanganpita quimsa junagllatam cawamurgan, Diospa Palabran gellgashgachöningannö. ⁵Tsaynö cawascamurmi puntata discipulun Cefas niyangan Pedrota yuripusquirrag, chunca ishca discipuluncunata yuripurgan. ⁶Tsaypa gepantanam pitsga pachac criyicug waugentsiccunata yuripurgan. Tsay criyicug waugentsiccunapitawan panintsiccunapitam cananyag cäsi llapan cawaycäyan, aunqui waquincagcuna wañushga cayaptinpis. ⁷Tsaypitanam Santiagota yuripunganpa gepantarag, llapan apostolnincunata yuripurgan. ⁸Tsaycuna llapanpa ultimu gepantaragmi, imayca juc tiempuchö yurishgatanö nogatapis yuripamargan. ⁹Nogalläga manam importantitsu callä llapan apostolcunapita imayca mana allita rurangäcunawan ni siquiera apostol niyämānanllapagpis, goricaycurnin Dios Yayaman criyicur mañacugcunata wañutsirnin gaticachangäpita. ¹⁰Pero Dios Yayam alläpa cuyacuyninwan yanapamarni acramar cachamashga, paypa Alli Willacuyninta willacunäpag. Puntataga Señor Jesucristoman llapan criyicugcunata wañutsirnin gaticachaycapti acramarni gayamanganga, manam envänutsu cashga. Tsaynö alläpa cuyamanganta agradëcicurmi, cay llapan apostolcunapitapis mas yachatsicurnin arushcä. Tsaynöga manam quiquilläpitatsu willacurnin rurashcä, sinöga quiquin Dios Yaya alläpa cuyamar poderninwan yanapamaptinmi. ¹¹Imanö captinpis nogapagga waquincag apostolcuna o noga willacungätsu manam mas välen, sinöga cay Alli Willacuy yachatsicuyängaman

rasumpa criyicuyangayquim masga välen.

Wañushgacuna cawayämungan

¹²Tsaymi cananga si nogacuna Señor Jesucristo cawamunganta willacuycaptiga, ñimanirtan waquiquiga “Wañushgacunaga manam cawayämungatsu” nicäyanqui? ¹³Pero si wañushgacuna manana cawayämunan caycaptiga, Señor Jesucristopis manach cawamunmantsu cargan. ¹⁴Señor Jesucristo mana cawamushga captiga, willacuyangäpis manam ni imapag väleptinmi, gamcuna criyicuyangayquipis ni imapag servinmantsu. ¹⁵Si tsaynö mana cawamushga caycaptin, “Dios Yayam Señor Jesucristota cawatsimushga” nir willacuycarga, alläpa llulla engañacur yachatsicug testiguncunach cayāman. Si wañushgacuna manana rasumpa cawayämunan caycaptiga, Dios Yayapis Señor Jesucristota manach cawatsimunmantsu cargan. ¹⁶Si wañushgacuna manana cawayämunan caycaptiga, Señor Jesucristopis manach cawamunmantsu cargan. ¹⁷Si Señor Jesucristo manana cawamushga caycaptiga, rasumpa criyicuyangayquipis manach ni imapag välenmantsu, jutsayquicunallachö condenacashga caycäyaptiquiga. ¹⁸Si tsaynö rasumpa caycaptiga, Señor Jesucristoman criyicucurnin wañugcunapis ogracashgachi caycāyan. ¹⁹Si cay patsa cawayällantsicchö Señor Jesucristoman confiacurnin shuyararga, llapan runacunapitapis alläpa mas llaquipaypagchi cashwan, wañushgacuna mana cawayämunan caycaptiga.

²⁰Pero rasuncagtaga Señor Jesucristom wañushgacunapita mas puntata imayca punta cosëcha yurignö cawamurgan,

llapan wañushgacuna juc junagchö cawayämunanpag musyatsicurnin.
²¹Rasumpam cay patsachö wañuyga juc runallawan gallarirgan. Tsaynöllam wañushgacuna cawayämunganpis, juc runallawan shamurgan. ²²Tsaymi llapan runapis unay Adánpa miraynin cayanpita wañuyanga. Pero rasumpa firmi criyicugcunam siga, Señor Jesucristowan cawayämur ni imay mana ushacag cawayta tariyanga. ²³Pero Dios Yaya dispöningannömi shumag ordenädu cawamuyga canga. Imayca puntacag cosëchanömi, Señor Jesucristom llapan wañushgacunapa puntanta cawamurgan. Tsaypita cay patsaman cutimuptinragmi, payllapana cangantsicpita paynö llapantsic cawamushun. ²⁴Tsaypitanam cay mundupa ushacaynin shamunga, Señor Jesucristo cay patsachö llapan chiquignin mas mandacuyyog autoridäcunatawan supaycunapa podernincunatapis jancat ushacascatsir, llapan Mandacuy Reynonta Taytan Dios Yayata entregapin. ²⁵Señor Jesucristo poderöso cayninwan mandacunanmi wanacan, llapan chiquignincunata imayca chaquinpa gopinman churagnö ushacätsinganyag. ²⁶Tsay ultimucag chiquignin contran wañuytapis jancatmi ushacätsinga. ²⁷Tsaymi Diospa Palabanchöpis nirgan: “Dios Yayam llapan chiquignincunata chaquinpa gopinman churashga.” Tsaynöllam quiquin Dios Yaya Señor Jesucristopa mandacuyinman llapan imaycatapis churashga. Pero tsaynö llapanta churashga caycaptinpis, quiquin Dios Yayataga Señor Jesucristo manam mandanmansu. Quiquin Dios Yayam Señor Jesucristopa Taytan car, llapan imaycatapis Tsurinpa mandacuyinman churashga. ²⁸Tsaynö Señor Jesucristopa mandacuyinman llapan imaycata

churashga captinmi, Tsurin Jesucristopis Taytanpa mandacuyinman entregacun, quiquin Dios Yaya alläpa poderöso cayninwan maytsay llapan imaycachöpis mandacug cananpag.

²⁹Si wañushgacuna mana cawayämunan caycaptinga, ¿imatatan jorgoyanqui wañushgacunapag bautizacurnin? Si wañushgacuna rasumpa ni imaypis mana cawayämunan caycaptinga, ¿imapagan tsay wañushgacunapag bautizacuyanqui? ³⁰Nogantsicga, ¿imanirtan imaycay örapis tucuyläya mantsaypag peligrucunachö caycantsic, wañushgacuna mana cawayämunan caycaptinga? ³¹Waugecuna y panicuna, musyayangayquinöpis rasumpacagtam niyag, Señor Jesucristoman firmi criyicuyangayquipita alläpa cushicungäta. Tsaynöllam Alli Willacuyininta willacungäraycu, mantsaypag peligrucunachö cada junag imaycata sufririn wañugnörög caycä. ³²¿Imatatan tsaypunga gänashcä, Efeso marcachö alläpa yaga runacunawan lücharpis? Si wañushgacuna mana cawayämunan caycaptinga nishwan: “iMicucushun y upyacushun waraymi wañucushun!” nir.

³³Ama engañayashunayquita dëjacuyanquitsu: “Mana alli compañerucunagam runamajincunatapis quiquinincunatanö mana alli ruragman ticratsiyan.” ³⁴Gamcunaga alli juiciuyquicunaman churacarin amana jutsacunata rurayaynatu. Waquiquiga Dios Yayatapis mana regeyaptiquim, pengacurnin yarpachacuyänayquipag niyag.

Wañushga cuerpu imanö cawamunanpag cangan

³⁵Talbesgam waquina tapucuyanga: “¿Imanörög wañushgacunaga cawayämunga? ¿Imanö cuerpuoyograg

shayämunga?” nir. ³⁶iTsayga mana ni ima musyag upanö tapucuymi! Imata murushgapis, tsay muruga wañurnin ismunragmi juc alli planta jegamunanpagga. ³⁷Manam juc jatun plantatatsu cuerputanö jegamunanpag muruntsic, sinöga juc ichiclla gränu trüguta o jucläya murullatam muruntsic. ³⁸Pero tsay murungantsic murutaga quiquin Dios Yayam imanö cuerpuyog cananapapis despönishga. Tsaymi cada cläsi murupa yuran cangantanölla quiquin plantatapis shumag jegatsimunga. ³⁹Pero tsaynö caycaptinpis manam lapanpa cuerpucunaga iwaltsu cayan, runapawan, wätacunapa, tucuyläya pärigcag wätacunapa y tucuyläya pescädocunapapis cuerpuncunaga. ⁴⁰Tsaynöllam angelcunapawan cieluchöcagcunapa cuerpuncunawan cay patsachöcag cuerpuncunapis jucläya cayan. Tsaymi cieluchö poderöso shumag atsiycag cuerpuncunano, cay patsachö cuerpuncunapis jucläya shumag cayan. ⁴¹Jucläyam rupaypa achaynin chipacyagga, quillapa atsiycayninpitaga. Tsaynöllam quillapa atsiycayninpis lucërocunapa atsiycayninpitaga jucläya, cada ünüm juccagpita mas jucläya cayan.

⁴²Tsaynöllam päsaंगा wañushgacuna cawamungan junagpis. Pampangantsic mana alli rurag cuerpum, mana jutsannag ni imay ushacag cuerpuna cawamunga. ⁴³Mana allita despreciarmin pampangantsic cuerpum, alläpa cushicuypag poderyogna cawamunga. Tsaynöllam pampangantsic cuerpum alläpa débil captinpis, cawamugcag cuerpuga allish firmi poderyog canga. ⁴⁴Pampangantsic cuerpuga cay patsachö cawanapagmi, cawamugcag cuerpum siga cieluchö cawanapag.

Tsaymi cay patsachö jucläya cuerpum cangannölla, cieluchöpis jucläya cuerpum canga. ⁴⁵Tsaypagmi Diospa Palabran gellgashgachö nirgan: “Puntacag runa Adänga, cuerpuyog y almayogmi rurashga cargan.” Pero gepacag Adännö runa Señor Jesucristoga juc cawatsicug Espiritum. ⁴⁶Tsaymi Dios Yayaga puntata cuerpuntarag camargan. Tsaynö camasquirragmi espiritunga churargan. ⁴⁷Puntacag runaga cay patsachö allpapitam rurashga cargan. Pero gepata yuricgag runaga janag patsa cielupitam shamurgan. ⁴⁸Cay patsachö yurishga runapa cuerpunga, allpapita rurashga cuerpullam cayargan. Tsaynöllam janag patsa cieluchö cawagcagcunapa cuerpuncunaga, cielupita shamug runapa cuerpunnölla cayanga.

⁴⁹Cay patsachö allpallapita rurashga runaricuglla cangantsicnömi, janag patsa cielupita shamushga runaricuglla cawacushun.

⁵⁰Cuyashga waugecuna y panicuna, caytam willayayniquita munä: Manam cay cuerpuntsicwan tulluntsicllaga salvamäshuntsu, cieluchö Dios Yaya caycanganman chänapag. Tsaynöllam pampashga ismurnin ushacag cuerpuga, cieluchö mana ushacag cawayman yaucuntsu. ⁵¹Pero juc pacaraycagnö secrëtu musyatsiyangagta shumag entendiay: Manam llapantsictsu wañushunga, pero llapantsicpa cuerpuntsicmi jucläyaman ticrayanga. ⁵²Ultimucag trompëta wagasquiptinmi, lapan wañushgacunapis cawayämunga manana ni imaypis wañuyänapag. Tsaynöllam cawagcagpis ñawintsic gepillasquignölla jucläyaman ticrasquishun. ⁵³Nogantsicpa ismur ushacag cuerpuntsicpis, mana ni imayca ushacag poderyog cuerpumanmi

ticranga. Tsaynöllam wañug cuerpuntsicpis ni imaypis mana wañugman ticranga. ⁵⁴Tsay ismurnin ushacag cuerpuntsic, mana ni imaypis ushacagman ticasquiptinmi y wañug cuerpuntsic mana wañugman ticasquiptinmi, Diospa Palabanchö ningan cumplinga: “Wañuytaga cawamuymi jancat ushacätsishga” ningan.

⁵⁵ “¿Ä wañuy maytan gampa ushacätsicuyniqui?

¿Maytan tsay imayca cashanö tuchicuyniqui?”

⁵⁶Tsay wañuyta tuchicuyninga jutsa ruraymi. Tsaymi jutsa ruraycunapa poderninga unaycag leycuna mandacunganta mana cäsungantsic.

⁵⁷iPero Dios Yayatam alläpa agradëcicü, llapan jutsantsicta vencenapag poderninta garamarnintsic, Señor Jesucristo yawarninta jichar cruzchö wañunganpita!

⁵⁸Tsaymi alläpa cuyashga waugëcuna y panícuna, imaypis firmi criyicurnin alli tsaracur cawacuyanqui. Gamcunaga imaycatapis mas animacurnin Señor Jesucristo munangannölla llapan voluntäniquiwan imaycatapis Dios Yayallapag rurayanqui.

Musyayangayquinöpis pay munanganta rurarnin cawacuyangayquiiga manam envänutsu canga.

Criyicug waugentsiccunapag colaboracionta gorinapag

16 ¹Criyicug waugentsiccunapag colaboracionta

goriyänayquipagga, Galicia marcachö criyicugcunata ningänöllam gamcunatapis niyëshayqui, llapayqui shumag goriyänayquipag.

²Domingocunachö goricarnin, cada

persöna imallatapis churayanga, segun gänayanganman y imayquicunapis cayäpushungayquiman. Tsaynö unaypitana cada domingocunachö shumag goriycäyanqui, chämuptirag apurädu gorirnin mana caycäyänayquipag. ³Tsayman chaycamurnam, gamcuna acrayangayqui runacunata Jerusalénchö criyicug waugentsiccunaman mandarmi, gamcuna goriyangayqui colaboracionta juc cartata aparcatsirnin mandashag. ⁴Si aywänä wanacptinga, tsay acrayangayqui runacunawanmi pagtancuna aywayëshag.

Apostol Pablo viajarnin Macedonia marcapa päangan

⁵Macedonia marcapa aywangäpita tsaymanpa cutimurmi gamcunacagparag chämushag.

⁶Tsayman chaycamurga gamcunawan pagtam juc tiempu cashag o talbesga llapan taya tiempu päsanganyag. Tsay tiempu päsaquiptin maypa aywaptipis, voluntäniquicuna captinga gamcunam viäjëchö yanapayämanqui. ⁷Canan shamurga manam juc ratitulla ricayniquicunallatatsu munä, sinöga gamcunapa pagtayquicuna päraytaragmi yarpaycä. Si Señor Jesucristo munaptinga juc tiempullapis gamcunawan pagtam cashun. ⁸Pero Efeso marcachömi quëdashag, asta Pentecostes niyangan fiestayag. ⁹Canan junagcunam nogapaga alläpa jatun trabäjü capaman Señor Jesucristopa Alli Willacuyninta willacunäpag, aunqui caychö waquincag mana alli runacuna amatsacurnin chiquiyämaptinpis.

¹⁰Si waugentsic Timoteo chamuptinga shumag chasquiycuyällanqui, mana

mantsacurnin cushishga cananpag. Paypis noganömi Señor Jesucristopa aruyninchö aruycan. ¹¹Ama maygayquipis despreciarnin jagayätsiyanquitsu, mas bien shumag chasquiycuyällanqui. Tsaynöllam shumag yanapaycuyanqui nogacagpa cutimurnin, alli päsaucuyinwan cushishga chämunanpag. Caychömi nogaga payta shuyaraycä, waquincag criyicug waugentsiccunawan pagta cushishga chäyämunaanta.

¹²Waugentsic Apolotam alläpa rugargä criyicug waugentsiccunawan pagta visitagniquicuna shamunanpag. Cananga manam ni imanöpa shamuyta munashgaragtsu. Pero imaycarpis puedingan öram visitagniquicuna shamunga.

¹³Gamcunaga wiyag wiyaglla, imaypis criyicuyniquicunachö firmi ni imapita mantsacur alli criyicuyniquicunachö alli tsaracur cawacuyanqui. ¹⁴Gamcunaga alläpa cuyacuy llaquipäcuyniquicunawan imaycatapis rurayanqui.

¹⁵Musyayanquinam Acaya provinciachö Estéfanaspa aylluncuna llapanpitapis mas puntata Señor Jesucristoman rasumpa firmi criyicyuanganta. Tsaynö rasumpa criyicug cayninwanmi waugentsic Estéfanasga llapan criyicugcunata imaycawan yanapar imaypis serviycan. Tsaymi wauegcuna y panicuna, gamcunatam alläpa rugaycuyag, ¹⁶Diospa Palabranta yachatsicug Estéfanastawan waquincag wauegcunata cäsurnin, cay alläpa aja aruychö imaycallawanpis yanapaycuyänayquipag. ¹⁷Alläpam cushicurgä waugentsiccuna Estéfanaswan Fortunato y Acaico

rantiquicuna shayämur, imayca wanangäcunata apamur yanapayämanganta. ¹⁸Paycunam llapayquipa rantiquicuna llapan imaycachöpis yanapayämar animatsiyämashga, gamcunata animatsiyäshungayquinölla. Tsay runacunataga shumag respëtuyquicunawan cäsurnin cushishga chasquiycuyällanqui.

**Apostol Pablo salüdüwan
despedicungan**

¹⁹Asia provinciachö goricaycurnin Dios Yayaman mañacug waugentsiccunam saludaycuyäshunqui. Tsaynöllam Aquilawan warmin Priscilapa wajinchö goricaycur Dios Yayaman mañacugcunapis, cuyayäshurniqui salüduyquicuna apatsicayämushunqui Señor Jesucristopa shutinchö. ²⁰Caychö llapan criyicug waugentsiccunapa salüdüncunata chasquiycuyällay. Tsaynölla llapayqui jucnin jucninwanpis, respëtuyquicunawan gagllayquicunachö mutsanacurnin saludanacuycuyay.

²¹Noga Pablom, cay salüduta gellgamü, quiquípa maquíwan y letrawan.

²²Si pipis Señor Jesucristota rasumpa mana cuyarga, alläpa maldiciunashga catsun. ¡Señor Jesucristoga shamuycullay!

²³Señor Jesucristopa cuyacuy yanapacuyin gamcunachö caycullätsun.

²⁴Tsaynöllam nogapis gamcunata alläpa cuyayag, Señor Jesucristopa shutinchö.

Tsaynö caycullätsun.